


柳田文庫  
文庫11  
D 289  
7

7



文庫11  
D289  
7

元書卷二十四

邵陽曾廉撰

食貨志第九

食貨之興蓋在於神農之世易曰斲木爲耜揉木爲耒耒耜之利以教天下蓋取諸益日中爲市致天下之民聚天下之貨交易而退各得其所蓋取諸噬嗑此其權輿也而尚書皋陶謨載禹之言曰洪水滔天下民昏墊予乘四載隨山刊木暨益奏庶鮮食予決九川距四海濬畎澮距川暨稷播奏庶艱食鮮食懋遷有無化居烝民乃粒萬邦作乂竊謂此遭洪水之患天下皆蔽於巨流洪浸不能如炎帝之舊故其時水鬱惟草山鬱惟木禹與益開險阻烈山澤而鳥獸羽毛之肉繁焉泊夫地平天成稼穡惟寶然小民猶艱難以爲食也而水族滋多魚蛤鱗介之屬助穀食者且半於是

元書

卷二十四 食貨志



010190563931

元書 卷二十四  
飽飫勤動百物充足而後積聚豐盈有無通矣自是以後公劉遷徙囊橐餼糧見於詩歌箕子陳範食貨列於庶政周人重農政取民者貢徹助兼行而前朝後市以商通貨以賈易物貨寶於金利於刀流於泉布於布束於帛此其所爲懋遷化居者也漢唐以來航海萬里市舶流通市肆珍石香木陳於宮府矣元興自龍沙以肉食爲宗蓋游牧之國地多水草宜畜牧牛羊駝馬在谷滿谷在山滿山師行所至亦以漁獵爲生水取魚鼈陸掠牛馬故能萬里不齋糧而無飢餒之患蓋鮮食之遺也食用旣樸風俗亦厚大抵人魁岸壯猛而善騎射故能精強力戰所向無敵非其人異亦堅樸之效也入中土旣久食稻衣錦筵備水陸之品堂室所陳設必有地衣壁帶金玉以爲酒器異珠名寶以爲婦人之飾於是純風衰市道盛矣故其始世祖以謝仲溫捕魚於江大被獎勵其後畿

輔不能興水利而以東南之粟漕京師天子且以龍衣御酒屈意盜賊何則食貨不備不足以自資給於是民貧而國瘁矣然其綜理權度所以足民贍用亦立國之經也前史言其出入之制一曰經理二曰農桑三曰稅糧四曰科差五曰海運六曰鈔法七曰歲課八曰鹽法九曰茶法十曰酒醋課十有一曰商稅十有二曰市舶十有三曰額外課十有四曰歲賜十有五曰俸秩十有六曰常平義倉十有七曰惠民藥局十有八曰市糴十有九曰賑恤具著於篇余謂元代經理未足以爲政也其植之於民者曰農桑其行之於國者曰鈔法其稅糧科差海運歲課鹽茶酒醋商稅市舶額外所謂入也歲賜俸秩惠民賑恤所謂出也市糴常平則上下通有無也余以海漕入河渠志歲賜絲鈔入寰宇志俸秩入職官志賑恤各備本紀而統計其成焉元初官更多厲政自私貲至鉅萬

而官無儲備太宗始定蒙古西域漢人賦算事具本紀尋太宗伐金命給平陽民牛具並關中人民墾地河東然國人猶欲空漢人田宅以爲牧地也耶律楚材爲立徵收稅課所而議始息當時歲凡銀五十萬兩帛八萬匹粟四十餘萬石太宗大悅未幾稍增百一十萬未幾奧都剌合蠻撲買至二百二十萬矣其時方定中原斷事官忽都忽料民括戶詔曰賦稅悉倣唐租庸調之法量土地之宜大朝開創之始宜務從寬大遂定科徵之法地稅中田二升有半上田三升下二升水田五升丁稅始每丁科粟二石增至四石後定民戶成丁者每歲一石驅丁五斗工匠僧道驗地官吏商賈驗丁歲書其數於冊由課稅所申省以聞此謂稅糧以爲之賦太宗因欲裂土分封親王功臣耶律楚材曰此嫌隙所生也不如多以金帛與之太宗曰已許奈何楚材曰若朝廷置吏收賦使無

擅科徵可也於是遂定歲賦每二戶出絲一斤以給國用每五戶出絲一斤以爲親王功臣湯沐此謂科差以爲之役未幾憲宗立又定包銀之法戶以二兩輸銀以二兩折收絲絹顏色矣然其時張晉亨卽言五方物產各異民難盡責輸銀語在嚴實傳其後世祖卽位知農桑爲王政之本也乃首詔天下國以民爲本民以食爲本食以農桑爲本乃立司農司專管農桑水利仍分布勸農官及知水利者巡行郡邑察舉勤惰所在牧民長官提點農事歲終第其成否申司農司及戶部秩滿之日注於解由戶部照之以爲殿最又命提刑按察使加體察焉其制村疇凡五十家立一社擇高年曉農事者爲之長增至百家則別設長一人凡種田者立牌檄書某社某人於其上社長以時點視勸戒不率教者籍以授提點官責之其有不敬父兄及凶惡者亦然仍大書所犯於門改乃

毀不改則罰充夫役疾病凶喪則社中助之凡爲長者復其身郡縣不得以社長與科差事又立提舉河渠官爲之濬治兼命之造水車鑿井或種區田以備亢旱又令民每歲種桑棗二十株雜木十株或種榆柳皆隨其土所宜又令各種苜蓿以防飢饉近水之家又許鑿池養魚鵝鴨及種蒔蓮芡蒲葦等以助衣食凡荒閒之地悉以付民其後高唐州官以勤升秩河南陝縣尹以惰降職而農民勸矣數年大司農言中書移文以畿內秋稼始收請禁民覆耕恐妨芻牧帝以農事有益詔勿禁是時遂重定戶籍稅則地稅定爲每畝粟三升丁稅元管全科戶定每丁粟三石驅丁一石減半科戶每丁輸全科三之一新收交參戶丁一歲五斗累增至六歲如全科之數協濟戶丁每歲如減半科之數而隨遠近輸倉貧者輸近倉富者輸遠倉每石折納輕費鈔二兩鼠耗三升分例四

升科差全科戶定爲每戶歲輸絲一斤六兩四錢包銀四兩五戶絲戶歲輸官絲一斤五戶絲六兩四錢而包銀同官戶減半科戶官絲五戶絲包銀皆半之而其餘又有止納絲戶止納鈔戶攤絲戶納絲戶漸成丁戶戶名繁多輸納參差不可縷舉也絲銀外又有俸鈔之科其法亦以戶之高下爲等於是以前合科之數作門攤分爲三限輸納被災之地許輸他戶而儒士及軍站僧道等皆不與焉其後又以江南戶鈔分食諸王貴戚功臣循太宗之舊也其山林川澤之產若金銀珠玉銅鐵水銀朱砂碧甸子鉛錫礬硝礬竹木之類皆有提舉司或總管府收其歲課其產地皆具於寰宇志中而阿合馬以言利進議增鹽課並興鼓鑄以農器易粟遂立尙書省人皆言其挾宰相權爲商賈罔羅天下大利矣又自元初承宋金之法行用交鈔太宗始命更造王文統事世祖在相位遂

以絲爲本而造交鈔每銀五十兩易絲鈔一千兩物值並從絲例是歲復造中統元寶交鈔以十計者四以百計者三以貫計者二每一貫同交鈔一兩兩貫同白銀一兩其昏爛者倒換之文統既誅遂詔天下立平準庫以均物價通利鈔法其後又立市易庫於諸路掌市易諸物然阿合馬惟炫致富之術以動天子而人言不恤也初元以酒醋鹽稅河泊金銀鐵冶取課於民而天下大利莫如鹽其次則酒醋及茶而倉庫院務官司總名曰商稅又有額外課凡三十有二曰秣日契本河泊山場窰冶房地租門攤池塘蒲葦食羊荻葦煤炭撞岸山查麴魚漆酵山澤蕩柳牙例乳牛抽分蒲魚苗柴羊皮蝨竹葦薑白藥又取回易之利曰市舶自中統定鹽法既平宋阿合馬請於南京等路籍藥材發鹽十二萬斤官自貿易又收宋交會而頒行鈔法於江南惟雲南行交會貳子貳者

貝也貳以一爲莊四莊爲手四手爲苗四苗爲索或以索爲橐二十索始值金一錢云尋又立榷茶都轉運於江州又請諸路立都轉運司增收課程官吏至用五百餘人陳巖范文虎且言其擾民並侵盜官錢矣阿合馬死盧世榮繼之遂立規措所始曰整治鈔法歲可增三百萬錠不取於民其議在本傳亦非不動聽也其後術不售而爲陳天祥所論事在天祥傳世榮誅死天子以張瑄朱清能治海漕拔爲萬戶賜印鈔富遂敵國明年桑哥爲尙書平章政事遂改造至元鈔自一貫至五十文凡十有一等每一貫當中統鈔五貫每花銀一兩入庫價至元鈔二貫出庫二貫五分赤金兩十之益以元寶交鈔行之既久物重鈔輕故也而時詔集百官於刑部議法眾欲計至元鈔二百貫爲滿賦趙孟頫言米絹二實銀錢二虛鈔又出於不得已當以絹計賦爲允且若以鈔論二十

年後至元鈔又必如中統矣語在孟頫傳然桑哥遂毀中統鈔板令稅賦並輸至元鈔其時益增茶鹽課又置浙東江東江西湖廣福建木綿提舉司歲責民納木綿十萬匹又置徵理司遣使四出鉤考天下錢穀於是剝及窮檐已徵者數百萬未徵者尙數千萬民自殺者相屬逃山林者則發兵捕之程鉅夫遂上言尙書純以剝割生民爲務所委任者率皆貪饕邀利之人江南盜賊以故竊發矣其後桑哥誅木綿提舉司及鉤考錢穀並罷行大司農燕公楠翰林承旨留夢炎言泉州上海澈浦温州廣東杭州慶元市舶司凡七所上海等皆十五取一獨泉州三十取一今宜依泉州爲定制而以温州併入慶元杭州併入稅務凡金銀銅錢鐵貨男女絲綿段匹銷金綾羅米軍器皆不得私販下海違者罪之逾年而世祖崩成宗立詔諸路平準交鈔庫所貯銀九十三萬六千九百

五十兩除留十九萬二千四百五十兩爲鈔母餘悉運至京師明年詔以農桑水利諭中外而括江南田定徵江南夏秋稅之制秋稅以租夏稅以木綿布絹絲綿等物益倣唐之兩稅而湖廣初依中原例改夏稅爲科門攤至是併徵夏稅而重罹其害矣大德元年括田令罷又罷妨農之政又禁諸王駙馬毋奪民田其獻田者有刑明年中書省臣奏每歲金銀鈔幣出入之數帝因是爲罷中外土木之役然自是國用日寢廣矣武宗卽位淮西廉訪使僉事苗好謙獻蒔桑法行之其時皇子和世琜言括河南歸德汝甯境內瀕河荒地可六萬頃請立總管府歲收其租省臣言亦馬罕妄稱省委括地以有主之田俱指爲荒所至騷動方議其罪遇赦獲免今乃獻地皇子河南連歲水災人方闕食若從其請爲害不細帝急命止勿行而省臣請權支鈔本七百一十餘萬錠以備急用

元書 卷二十四 六  
於是樂實請更鈔法新式以進又與保八請復立尙書省帝並從之自世祖誅三凶人不敢復言尙書省事初世祖禁江南行用銅錢以鈔法當行於江南故也已而盧世榮言宜括銅鑄至元錢與鈔參行其後又議更鈔用錢尙書劉宣言利民權物其要自不妄用始若欲濟邱壑之欲非惟鑄造不敷抑且不久自弊至是復立尙書省以樂實言頒行至大銀鈔二兩至二釐止定爲一十三等每兩準白銀一兩黃金價十減其九至元鈔則五貫而令隨路立平準行用庫買賣金銀倒換昏鈔或民間絲綿布帛赴庫回易依驗時估給價金銀私相買賣者禁之其歲罷中統鈔復以樂實言增江南富民糧而質其子爲軍明年立國資院泉貨監以行銅錢法詔天下錢凡二品曰至大通寶者準至大銀鈔一釐曰大元通寶者準至大通寶錢十文而尙書省又請以至元鈔輸萬億庫銷

毀其板止以今至大鈔與銅錢相權通行爲便從之又明年武宗崩仁宗立罷尙書省以樂實等亂政害民誅之遂罷至大銀鈔銅錢詔曰世祖立中統至元鈔法公私蒙利五十年於茲矣比尙書省不究利病輒意變更鈔以倍數太多輕重失宜錢以鼓鑄弗給新舊恣用曾未再期其弊滋甚今宜變通以復舊制明年延祐元年江淮漕臣言江南殷富蓋由多匿腴田若行檢覈法當益田畝累萬計平章張閻亦言經理大事世祖亦嘗行之但其間欺隱尙多未能盡實以熟爲荒者有之懼差而析戶者有之富民鬻田仍貧民舊名輸稅者有之由是歲入不增小民苦病若令有田之家及各位下寺觀學校財賦等田一切從實自首庶幾稅入無隱差徭亦均於是經理之議興而期限猝迫貪刻用事富民黠吏並緣爲姦以無爲有虛具於籍矣是時鐵木迭兒在相位猶以爲未實



也復下令括田與張閩朋比爲惡迫民死者九人而贛民蔡九五遂反陷汀州甯化稱王於是臺臣遂言蔡九五之亂皆由昵匪馬丁經理田糧與郡縣橫加酷暴逼抑至此新豐一縣撤民廬千九百區夷墓揚骨虛張頃畝流毒居民乞罷經理及冒括田租制曰可並免江南自實田租其河南自實田至五年始止科其半汴梁一路凡減虛增之數二十餘萬石矣其時申秋耕之令又以社桑分給諸民而有司視爲具文但附會時相相與爲利江浙右丞曹立領諸番回易事官自發船貿易細物十抽其二粗者十五取二仍禁人下番私往者沒其貨又預賣來歲鹽引鐵貨以足先年之用其後英宗嗣立詔凡差役造作先科商賈末技富實之家以優民力明年復詔行助役法遣使考視稅籍高下出田若干畝使應役之人歲掌之收其歲入以充役費官不得與是歲泰定帝立復

命江南民戶有田一頃以上者於所輸稅外每頃量出助役之田具書於冊里正以次掌之如至治之法又凡寺觀田除宋舊額其餘亦驗多寡令出田助役民困稍蘇矣其時虞集以東南漕糧食京師不如畿輔圖自立因上言京師之東瀕海數千里北極遼海南濱青齊萑葦之場海潮日至淤爲沃壤用浙人之法築堤捍水爲田聽富民欲得官者合其眾分授以地官定其畔以爲限能以萬夫耕者授以萬夫之田爲萬夫之長千夫亦如之察其惰者而易之三年視其成以地之高下定額於朝廷以次漸征之五年有積蓄命以官就所儲給以祿十年佩之符印得以傳子孫如軍官之法則東面民兵數萬可以近衛京師外禦島夷遠寬東南以紓疲民遂富民欲官之志而獲其用江海游食之類亦有所歸矣時不能用洎天順帝卽位於上都懷王闕入京師自燕以南聲息隔

元書 卷二十四 九  
絕乃造鈔板以濟國用未幾帝崩御史遂阿文宗言鈔法歲有所  
稽以新易舊不出其數倒刺沙構亂上都以經費不足令有司刻  
板印鈔今事已定急宜將毀從之明年更鑄鈔板仍毀其利者至  
順二年燒在京積還倒昏鈔二百七十餘萬錠初茶課才一千二  
百餘錠自至元立江州榷茶都轉運司歲有增益延祐末遂至二  
十八萬九千二百一十一錠當時鄧文原廉訪汀東痛言其害事在  
文原傳至治時文原申言利病亦不報至天祿時始罷榷司而歸  
州縣然其數則仍元祐云其時歲入租千二百一十一萬四千七百  
餘石江南夏稅中統鈔十四萬九千二百七十餘錠包銀差發鈔  
九百八十餘錠貳百一十三萬三千一百一十九索絲百九萬八千  
八百四十三斤絹三十五萬五千匹綿七萬二千一十五斤布二  
十一萬一千二百二十三匹歲課金四百八十九錠銀一千五百

六十一錠銅雲南二千三百八十斤鐵湖廣等省四十四萬一百  
二十斤別課鈔千八百八十錠鉛湖廣千七百九十八斤別課鈔  
九百三十八錠礬二千四百五十錠硝礬二十六錠竹河南二十  
六萬九千七百竿板木五萬八千六百條別課鈔萬四千三十錠  
鹽七百六十六萬一千錠酒醋四十九萬千六百錠商稅九十三  
萬九千錠額外十萬九千一百錠又有秣日課中統鈔四萬五千  
九百錠契本中統鈔九千一百錠視至元時蓋不啻百倍矣而是  
時省臣上言度支今歲芻藁不足常例支給外凡陳乞者宜勿予  
又言恩賚不宜濫及罔功鷹鷄獅豹之食舊支肉價二百餘錠今  
增至萬三千八百錠控鶴舊止六百二十八戶今至二千四百戶  
又佛事以今較舊歲增多金一百五十兩銀二千六百兩鈔五萬  
六千二百錠幣帛三萬四千餘匹宜悉裁汰中政院又言皇后日

用所需鈔十萬錠幣五萬匹綿五萬斤詔鈔予所需之半幣給萬匹自太宗定歲賜甯海王銀三十錠段百匹淄川王銀百錠段三百匹濟南廣甯王國王那顏銀段均如淄川濟南加綿六百二十五斤小銀色絲五千斤羊皮千張國王綿五千九十八斤羊皮五百張加絹五千九十八匹凡折中統鈔百二十錠金十六錠四十五兩朮赤大王段如國王加常課段千匹察合台大王銀段綿如濟南加常課金六錠六兩阿里不哥大王河間王銀段均如濟南大名王銀十六錠三十三兩段五十四匹合丹滅里合失闊端曲出太子皆同曲出加銀五十錠段百匹其後阿速台大王銀八十二錠段三百匹旭烈兀末哥撥綽大王段同而旭烈兀銀則百錠末哥撥綽半之裕宗后銀五十錠段絹各千匹安西北安王段絹同平遠西平愛牙赤鎮南王雲南王忽都帖木兒太子皆銀五十錠段

匹物料共折鈔二千六百五十六錠晉王段絹各千匹又太祖四斡耳朵段皆七十五匹大斡兒朮銀四十三錠紅紫羅三十四匹染絹百匹常課段八百匹餘皆銀五十錠二斡兒朮又常課段千四百九十四匹三斡兒朮常課段六百八十二匹世祖四斡兒朮皆銀五十錠而二斡兒朮加銀七錠段百五十四匹順宗后段五百匹武宗眞哥皇后銀五十錠鈔五百錠完者台皇后銀五十錠又帶魯罕公主銀四錠八兩段十二匹欠帖溫絹百匹弓絃千條札八忽娘子常課段四百七十四匹脫力失萬戶常課段三十三匹伯要歹千戶段二十四匹典迭兒常課段六十四匹太平王金十錠銀五十錠鈔萬錠代有所益而登極恩例世祖以來太后爲取眞定金銀賞推戴功事具布魯海牙傳洎成宗定朝會賜與太祖位金千兩銀七萬五千兩世祖位金五百兩銀二萬五千兩武宗命賜與悉從

成宗然省臣言朝會應賜者爲鈔三百五十萬錠未給尙百八十萬兩都所儲已虛遷延至於英宗遂命停諸王賞賚及皇后苔里麻失等歲賜然非時賞給及內降旨賜與者不可悉書也佛事自至元三十年閒醮祠之目僅百有二後遂增至五百有餘僧徒營結近侍欺昧奏請歲費千萬其土木營繕宮府建築並寺觀私第無歲無之侍臣奏乞賜賚往往伺人主喜悅輒稱乏財無居及嫁娶或以伎物呈獻遞互要求游惰之徒又復妄投宿衛部屬及宦者女紅大醫陰陽之類一歲所請衣馬芻糧十戶所徵入猶不足以給之泰定時丞相旭邁傑故請減廐馬汰衛士及節諸王濫賜而泰定以藩服登大位勢不能行也文宗亦如之是時中丞史惟良遂疏言今郡縣被災者眾國家經費若此之難帑藏空虛生民凋瘵此正宜更新百廢之時宜遵世祖成憲汰冗濫蠶食之人罷

土木不急之役並釐正諸不便如此則禎祥可致不然將其弊滋深治亂之由恐自此分矣帝嘉納之然實不能改也踰歲省臣復上言近歲空虛其濫費有五曰賞賜曰作佛事曰創置衙門曰濫冒支請曰續增衛士鷹房請與院臺及怯薛官同加裁省帝又從之而虛糜如故其邊庭備軍需則市糴之法有二曰市糴糧鹽折草皆增其直而市於民其後價懸殊而官吏多需索名曰和糴實則強也常平倉置於路府始議米賤增糴米貴減糴後以和糴糧及諸河倉所撥糧貯焉其後又以鐵課糴糧充焉亦猶市糴之法又社置義倉豐年則納穀荒歉則就給惠民藥局行於二都及各行省良醫主之以療貧者其始官給鈔本月營子錢以備藥物失陷官本則革罷之然皆日久寢息具文而已其後順帝幼冲踐位益多所廢弛至正二年李宏上言國朝既於江州設立權茶都轉

運司仍立提舉司七每杪歲初吉本司差人勾集提舉司官吏關領次年據引及到司已及旬月又必需求滿欲始以據引給付爲時則春月已過矣又有分司官吏驗戶散據賣引每引十張除正納官課一百二十五兩外又納中統鈔二十五兩名爲搭頭事例錢實則分司官吏餽贖之資是提舉官不過爲運司官吏營辦貲財又可籍名收斂遷延至茶戶得據還家又已五六月矣碾磨方興而吏卒又已踵門催併初限不知茶未發賣何由得錢充裕者尙須別行措辦力薄者例被拘監無非典鬻家私以應官限及終限不能足備上司緊併重複勾追此皆由運司給引之遲分司苟取之過茶戶本圖求利反受其害日見消乏逃亡情實可憫今莫若令運司正月將據引散盡無使提舉多受分例妨誤造茶時月仍不許分司自行散賣據引違者從憲司糾治庶貪贖之風可以

少革是時御史王思誠侯以禮又言京師自大德七年罷大都鹽運司設官賣鹽局十有五泰定二年罷元統元年復之今又十年法久弊生計常白鹽一千五百引用船五十艘官鹽二萬引船五十艘而運司所遣之人擅作威福南抵臨清北自通州所至以索截河道舟楫往來無不被擾名爲和糴實則強奪一歲之中千里之內凡富商之載米粟與達官之載室家無不得賄放行而貧弱者則拘留之其舟小而不固滲漏侵盜不可窮究既達京廠又不得依時交收淹延歲月困守無聊鬻妻子質舟楫者有之客船不前百物涌貴實由於此且局多雜費當時設官但爲民食貴鹽豈知官賣貴而商販反賤若罷監局於來歲榜告鹽商入京興販又於江南造小料船五十艘以運白鹽由運司雇運庶舟楫通而商賈集百貨不貴而鹽亦賤疏入報可鹽自至元中頒新格鹽法至

大中又新降鹽法其後引課竝增於是河間山東陝西兩淮兩浙  
福建廣東四川各指陳鹽額增重散派各鹽椿配民食之害正額  
未行餘鹽過多亭戶竈丁困苦流離逃徙死亡之禍咸請釐弊減  
引其諸稅務大抵弊竇繁滋上下好爲私利黎民重困而盜賊興  
矣數歲脫脫爲丞相以右丞悟良哈台左丞烏古孫良楨言立司  
農分司以開畿輔農田西至西山東至遷民鎮南至保定北至檀  
順皆修水利立法佃種更募江南善種水田能修圍築堰者爲師  
歲用大稔蓋符虞集之策其時江南海運不時至亦以此稍濟京  
師而是時國民俱病先是翰林侍講學士揭傒斯請兼行新舊銅  
錢以救鈔法之弊不行脫脫入左都事武祺吏部尙書僕篤哲言  
乃置諸路寶泉司於京師以鑄至正錢並行至正交鈔詔曰我世  
祖頒行中統交鈔以錢爲文雖鼓鑄未遑而錢幣兼行之意已具

後造至元寶鈔以一當五名曰子母相權而錢鈔未嘗用也今鈔  
法偏虛民用匱乏爰謀拯弊乃鑄至正通寶錢與歷代銅錢兼用  
以實鈔法用上副世祖初意於是省院共議皆迎合脫脫意祭酒  
呂思誠獨慮民藏其實而棄其虛非國之利語在思誠傳中脫脫  
不從遂以楮幣一貫文省權銅錢一千文中統交鈔比新楮幣至  
元交鈔準二貫而通行如故行之未久物價騰踊果如思誠所言  
又值海內大亂軍儲賞犒每日印造不可數計交料散滿人間京  
師料鈔十錠易斗粟不可得所在郡縣皆以物貨相貿易公私所  
積之鈔遂俱不行人視之若弊楮國用由是窘急而元遂亡  
論曰劉秉忠對世祖曰錢用於陽楮用於陰國家龍興沙漠幽陰  
之域宜用楮幣若用錢四海將不靖其後屢用錢而迄不行何也  
馬亨以交鈔可權萬貨爲法使然而以法爲人主之柄斯言諒矣

元書 卷二十四  
三  
故苟得其柄楮亦錢也否則錢亦不能用況於楮哉元始終行中  
統至元交鈔蓋有由矣而賦稅兼租庸調及兩稅法驗地及戶丁  
租庸具矣絲料其調耶然何以地戶丁皆以粟而別以絲料爲科  
差又何以有包銀而益以俸鈔也重遞征求豈用一緩二之道卒  
之歲入日增月益而國加窘急所謂不節若則嗟若者乎

衡陽聶濬泉

金盛輝 刊

曾和軒

門人曾俞元襄校

門人曾士琮詳校

元書卷二十四

元書卷二十五

邵陽曾廉撰

兵刑志第十

昔在唐虞蠻夷猾夏寇賊姦宄皆見懲於士師故班固曰聖人因  
天秩而制五禮因天討而作五刑大刑用甲兵其次用斧鉞大者  
陳諸原野小者致之市朝故干戈弓矢以威不道敢抗顏行草薶  
而禽獮之刑之大者也其有頑梗不循天常鑽鑿鞭朴流諸四裔  
刑之小者也宋子罕曰天生五材民並用之廢一不可誰能去兵  
聖人治天下道之以政亦不能不齊之以刑也自周初司馬司寇  
分職而治戰國以來申不害韓非綜核名實遂有刑名家而嚴酷  
之意多矣而起翦頗牧則當時所謂爭地以戰殺人盈野爭城以  
戰殺人盈城者也孫武著兵書尤極精微善窺彼己之形虛實之

用公輸般墨翟則各以攻守著聞器械之制興矣此亦毒天下之大也自是而秦并六國劉項喋血以亡嬴族遂以韓信申兵法張蒼定律令爲國大政其後兵家無大著者至唐而後李靖李世勣號爲大將克繼淮陰而唐律亦作自太宗之世最名平允刑罰世輕世重而天下大亂則大才生小亂則小才生天亦與世爲轉移焉故曰強漢弱宋漢何以強其君剛勁而臣効死力以雪國恥宋何以弱其君姑息而臣有保境息民之論漸漬以致此也故刑不可淫也亦不可弛也兵不可窮也亦不可銷也元興於沙漠不兒罕之山其初者勒茂博爾朮一二人相爲盡力而已至泰赤烏來犯已有兵十三翼太祖卽大位遂有萬戶三千戶九十五其後遂滅國四十威薄於四海矣其行軍人有馬復有從馬及駱駝之屬兵進不計後路不問餉源往往窮極廣莫飢則掠取牛馬雜畜或

自漁獵渴則刺馬駝血以飲無風雪之避無瘴癘之防行之數萬里而不疲出入乎風雨毒陽穹嶺陰谷荒磧幽林而不忘蓋自古以來用兵未有如元之堅悍者也然平宋以後兵反脆弱矣至於季世張士誠以十三人橫行江淮而不能制迹其所以盛衰亦古今得失之林也而其兵制有可得而言者元初長百人者曰百戶亦曰把總長千人者曰千戶軍盈萬人則爲萬戶以統攝之其軍有蒙古軍有探馬赤軍蒙古軍皆國人探馬赤軍則諸部族也其法家有男子十五以上七十以下無眾寡皆僉爲軍十人爲一牌設牌頭上馬則備戰鬪下馬則屯聚收養孩幼稍長又籍之曰漸丁軍而其室家則皆曰奧魯凡出征者諸奧魯仍不免雜泛徭役也其入宿衛者則爲天子之禁兵曰怯薛歹領於四怯薛長四怯薛長者開國功臣四傑之後也其主弓矢鷹隼之事者曰火兒赤



昔寶赤怯憐赤書寫聖旨者曰札里赤爲天子主文史曰必閣赤親烹飪以供上飲食曰博兒赤侍上帶刀弓矢者曰云都赤闊端赤司閹曰八刺哈赤掌酒曰荅刺赤典車馬曰兀刺赤莫倫赤掌內府尙供衣服曰速古兒赤牧駱駝曰帖麥赤牧羊曰火你赤捕盜曰忽刺罕赤奏樂曰虎兒赤皆在天子左右服勞侍從而分番直焉故元無寺宦干政之禍由天子親近皆用文武之士故也其事亦世守之雖以才能授任使服官政貴盛之極然一日歸至內庭則執其事如故至於子孫無改此其所以爲善也其後世祖又設樞密院以節制內外諸軍內則五衛以象五方諸衛亦復有增置改易事皆具職官志中而其軍有充圍宿或儀仗或扈從看守巡邏鎮邊皆惟上所裁外則諸鎮戍皆其所轄也初太祖視山後人與蒙古一體旣平中原於是始有漢軍或以貧富爲甲乙戶

出一人曰獨戶軍二三戶而出一人則爲正軍戶餘爲帖軍戶或以丁男論常以二十丁出一卒或十丁出一卒或以戶論二十戶出一卒而限年二十以上者充若卒有富商大賈則又取一人曰餘丁軍或取諸匠曰匠軍或取諸侯將校子弟曰禿魯花軍禿魯花言質子也其時設五萬府以鎮中原諸邊疆皆有探馬赤官或設達魯花赤以鎮撫之凡軍死亡更代或合併補貼遷調皆有其法逃戶復亡皆有其籍然未有水軍也自至元三年董文炳造戰艦以習水戰七年阿朮劉整圍襄陽復敎水軍七萬餘人畫地爲船而習之而水師萌芽矣及平宋後又得宋兵曰新附軍當是時海內混一世祖命宗王將兵鎮邊徼襟喉之地而河南山東據天下腹心則以蒙古探馬赤軍戍之而總於各道宣慰司都元帥又立行樞密院於江南三省付以行省見管軍馬尋立三萬戶府蒙

古漢人新附軍相參爲三十七翼上萬戶宿州蘄縣真定沂鄆益都高郵沿海七翼中萬戶棗陽十字路邳鄧懷孟杭真八翼下萬戶常州鎮江廬潁亳州安慶江陰益都新軍湖州淮安壽州楊泰處州上都新軍黃州安豐松江鎮江水軍及建康二十二翼水軍弩手並隸焉未幾江淮行省平章不憐吉歹上言行省丞相忙兀臺多變亂伯顏阿朮成法移置江南鎮戍於是重立浙東等萬戶府更擇瀕海沿江要害二十二所分兵閱習水戰伺察諸盜其時又征海外諸番水軍大興其後元貞中以太傅伯顏言罷行樞密院而仍隸各行省而行省權益重矣越再歲大德元年河南行省言前揚州立江淮行省江陵立荆湖行省其後江淮移杭州荆湖遷鄂州又設河南江北行省於汴梁通管江淮荆湖地面所屬之地大江最要兩淮地險人頑宋亡始來歸順當時沿江定制三十

一翼軍馬鎮遏後十二翼他調乞發原翼以防未然樞密院以爲三十一翼之說簿書所無也河南省官亦言無樞密院文大率元兵極爲勇悍而主兵又過於秘密其初過於殺戮每兵過輒摧殘其城郭殘害其人民惟僧道工匠得免其後以江南初定猶多反側則募民能進討者自爲一軍賴博羅歡言徒奪人妻孥財賄仇怒益滋矣乃止然終元之世皆忌漢人主兵南人尤甚以兵籍係軍機重務漢人不得閱其數惟樞密重臣職專軍旅得閱亦止長官一二人知之其省臺官覈軍數者罪死故立國百年內外兵卒之多寡人莫敢問其籍亦未盡具也其時至順中詔裁省衛士若各宿衛有容匿漢南人高麗人及奴隸濫充者罪在怯辭官及其長其在行省則以國人提調軍馬故事漢人不得預軍政然在世祖之世乃顏之叛用右丞葉李言以李庭將漢軍列前以漢法戰

乃顏遂就禽事在烈祖四王傳其後王克敬參政江浙竟以漢人調兵征徭寇而嶺海以靖又察罕帖木兒起兵以平秦晉青豫是皆漢人也其時吳當黃昭募民兵討賊又幾定江西而參政朵歹以爲南人不宜典兵矣蓋國人雖雄桀而私其黨類往往草芥諸人至於季末益肆驕悖妬功疾能勝則相爭敗不相救時多逗留奔潰與中統至元時勇怯又懸殊矣是時盜賊蔓延國兵不能制至正十三年立義軍千戶水軍千戶所於江西明年立南陽鄧州等處毛胡盧義軍萬戶府毛胡盧者金商義兵以獸皮爲矢房狀如瓠也十五年復立淮東等處宣慰司於天長統濠泗義兵萬戶府并洪澤等處義兵聽富民願出丁壯五千名爲萬戶五百名爲千戶百名爲百戶仍降宣敕牌面又或號其長曰義軍元帥然當時惟察罕帖木兒父子能憤激立功績躬自搏擊力圖恢復若田

豐等十萬戶相繼背叛而山東遂失又調苗軍以助征討而所在劫殺無異盜賊矣其時遂置分省分院以調遣諸軍而綱維卒散國遂以亡至馬政則牧地十有四曰東路折連怯呆兒等處曰玉爾伯牙上都周圍曰哈刺木連等處曰阿刺忽馬乞等處曰斡斤川等處曰阿刺察不罕曰甘州等處曰左手永平等處曰右手固安等處曰亦奚不辭曰蘆州曰益都曰火里禿麻曰高麗耽羅國周迴萬里其馬以千戶或百戶主之而歲以供上乘及馬乳馬在民間者亦百取一或三十而取一殺乎此則免然元時多供國用及以乳供醞若遇征戍及邊圉乏馬則和市或拘括以供倉卒之用惟婦人兒童皆習騎射能禦侮云初太祖頒條畫刑獄惟重罪取死其餘雜犯量情笞決然將吏多貪暴無人理咸得不鎮燕常殺人盈市事具耶律楚材傳太宗大會諸王百僚諭以條令語亦

在本紀中而憲宗時世祖在藩過燕見行省布智兒等一日殺二十八人且有既杖釋復追還試環刀者世祖詰責之問以何刑皆愕不能答也其後世祖卽位詔軍中犯法不得擅自誅戮罪輕斷遣重者奏聞又重誣告之罪漸有志於清刑獄矣然其時阿合馬盧世榮桑哥當國有無罪而誅者不可勝數也是時猶習用金泰和律至元二十八年始用至元新格世祖又嘗謂宰臣曰朕或怒有罪使殺汝必遲迴一二日乃覆奏然治阿合馬則發冢戮屍縱犬食之四子皆誅戮或醢或剝皮以徇其誅盧世榮則剖其肉以飼禽獺事皆出五刑之外其懲大慝如此明年制贓罪十有三等其枉法者五自一貫至十貫笞四十七不滿貫者量情斷罪除名十貫至二十貫笞五十七二十貫至五十貫杖七十七百貫以上杖一百七不枉法者八一貫至十貫笞同枉法不滿貫者量情斷

罪解任別仕二十貫至五十貫笞同枉法注邊遠一任五十貫至百貫杖六十七降一等百貫至百五十杖七十六降二等百五十貫至二百貫杖八十七降三等二百貫至三百貫杖九十七降四等三百貫以上杖一百七除名貪墨少戢矣而是時盜賊縱橫閩海廉訪使程鉅夫上言比年劫盜殺人所在多有一經告發巡尉吏卒名爲體覆而被盜之家及其鄰右先已騷然及付有司則主吏教以轉板平民坐展歲月幸而讞定不過杖一百七而枝蔓被逮平人之死於獄者反十四五況劫盜幸免必圖報復而告發之家無遺種矣是益張賊勢也夫藏兵器者法論死況以兵器行劫而罪止於杖此何理也今後應照藏兵器從重治罪郡府以便宜從事竝免待報庶使凶人警畏平民安帖逾再歲成宗元貞元年以多盜詔問弭盜方略山東廉訪使陳天祥言古盜賊之起各有

所因歲凶飢饉此可委之天時若夫軍旅不息工役薦興厚斂煩刑皆足致盜而所以保護存養之者赦令是也赦者小人之幸君子之不幸一歲再赦善人暗啞前人言之備矣彼強梁之人各執兵杖殺人于貨不顧其生有司盡力以禽之朝廷加恩以釋之朝脫纍囚夕復行劫耳彼性已頑定既不感恩亦不畏法非嚴刑誠無以制其暴也於是立禽盜格督責盡滅然未能盡行也其歲又詔賊吏論罪再犯者加二等又制倉庫官吏盜所守穀罪論直滿三百貫者死計賊以至元鈔爲則先是翰林學士王暉上書曰法者輔治之具君操於上永作成憲吏承於下遵爲定式民曉其法易避而難犯若周之三典漢之九章是也今國家有天下六十餘年大小之法尙無定議至平刑議斷未免有酌量準擬之差彼此輕重之異臣愚謂宜將累朝聖訓與中統迄今條格通行擬議參

而用之與百姓更始如是則法無二門輕重適當吏安所守民知所避而天下治矣大德三年遂命何榮祖更定法令其先至元新格亦榮祖所定也而其時問刑之官多所糾紛有隸宗正府有隸樞密院都護府或宣徽院中政院諸王傅相內史府金玉府拱衛司又有隸宣政院道教所白雲宗所者七年衢州鄭介夫復極言刑書不定之弊語在介夫傳中其後數歲武宗立中書省言刑法者譬之權衡不可偏重世祖已有定制自元貞以來以作佛事諸死罪賄賂作禿魯麻釋之太寬故有司無所遵守今請凡內外犯法之人悉歸有司依法裁決又請將世祖卽位以來所行條格校讐歸一遵而行之制可至大四年仁宗立以編定政令有關風紀號曰風憲宏綱其後英宗立丞相拜住復請詳定舊典至治三年遂頒行大元通制於天下其條目名例四衛禁八職制三百七祭

令五學規十三軍律十二戶婚六十九食貨二十六惡五十一  
姦非五十九盜賊百一十四詐僞五十訴訟二十二鬪毆四十二  
殺傷一百六禁令百一十一雜犯十四捕亡九恤刑十五平反四五  
刑之制笞刑六自七下遞加十至五十七杖刑五自六十七遞加  
十至一百七徒刑五自一年遞加平年至三年凡徒一年杖六十  
七遞加至一百七流刑三曰遼陽曰湖廣曰迤北死刑二曰斬曰  
凌遲處死獄具枷手杻腳鐐皆有輕重尺寸笞杖訊杖皆有分釐  
大小頭並刊削節目無令筋膠諸物裝釘先是王約嘗上言國家  
之制笞杖十減爲七今之杖一百者宜止九十七不當又加十也  
曹伯啟又言五刑者刑異五事今黥杖徒役於千里之外百無一  
生還者是一人身備五刑也拜住亦是其言會伯啟出廉訪浙西  
遂不果改久之監察御史蘇天爵奏國家自太祖勘定中夏法尙

寬簡世祖混一海宇肇立制度列聖相承日圖政治雖法令之未  
行皆因事以立法歲月既久條例滋多英宗始命中書定爲通制  
頒行多方官吏遵守然至今又幾二十年矣夫人情有萬狀豈一  
例之能拘加以一時官曹材識有高下之異以致諸人罪狀擬議  
有輕重之殊繁條碎目與日俱增每罰一辜或斷一事有司引用  
不能通舉若不類編頒示中外誠恐遠方之民或未識而誤犯姦  
貪之吏獨習知而舞文宜從都省早爲奏聞精選文臣學通經術  
明於治體練達民政者圍坐聽讀定擬去取續爲通制刻板頒行  
中間或有與先行通制參差抵牾本末不應悉當會同講貫畫一  
要在詳書情犯顯言法意通融不滯於一偏明白可行於久遠庶  
列聖之制度合爲一代之憲章矣其後順帝後至元二年中書員  
外郎陳思謙言強盜但傷事主皆死而故殺從而加功之人與鬪

殺人例杖百七得不死是與私宰牛馬之罪無異也因姦殺夫所姦妻妾同罪律有明文今止坐所犯似均失推明帝令法曹更定罪例著爲定制其歲復詔強盜皆死盜牛馬者剽盜驢騾者黥額再犯剽盜羊豕者墨項再犯黥三犯剽剽後再犯者死盜諸物計物論罪亦定爲令明年帝命平章政事昂吉兒監造刑政條例丞相伯顏請殺張王劉李趙五姓漢人帝不許六年又命翰林學士荅罕宣文閣學士夔夔等刪修通制焉明年書成其後至正六年乃始頒至正條格於天下大率元時刑尙輕典而舊史論其弊在南北異制事類繁瑣挾情之吏舞弄文法出入比附用譎行私而凶頑不法之徒又數以赦宥獲免至於西僧歲作佛事或恣意縱囚以售其姦俾善良者喑啞而飲恨蓋如鄭介夫之言又言元之刑法其得在仁厚其失在弛緩而不知檢也可謂知本末矣

論曰易訟師起於飲食宴樂君子致慎於杯盤衽席之間天保定爾民之質矣故神武而不殺無情者不得盡其辭羸劉以降武人志剛芻狗萬物計功以首而屠伯復興矣元起自朔方秉西北肅殺之氣故雄於征戰而明慎用刑噬乾肉得黃金仁之道也然立國百年刑弛而兵亦慮矣傳曰晏安酖毒國之不振晏安之咎也

湘鄉張國彥刊

金城刊

門人曾傳澄襄校

門人曾士琮詳校

元書卷二十五

元書卷二十六

邵陽曾廉撰

后妃列傳第一

太祖母宣懿皇太后斡勒忽訥氏名月倫亦曰訶額侖生太祖及哈撒兒王合赤溫大王鐵木哥斡赤斤國王鐵木倫長公主烈祖沒太祖甫九歲時忽魯刺汗亦沒秦赤烏氏主蒙古族而咸補海汗二可敦輕太后方祭祀不與食飲明日移帳竝遺太后母子去烈祖部屬亦皆叛附秦赤烏后疾騎持兵追還後卒叛往太祖稍長又為秦赤烏虜去幾死蔑里乞復來尋仇全家急遁入山當是時危難顛覆太后沈毅仁惠有智略卒撫長太祖兄弟輒參決軍旅以太祖性剛果於殺戮恆戒飭之太祖為汗時札荅刺以釁集十三部來攻太祖亦分部人為十三翼迎之太后與諸王為一翼



以戰太祖卽尊位分太后與季弟鐵木哥共部下萬人太祖曰立國者我母也後以帖卜騰格理譖哈撒兒王於太祖太祖頗信其譖太后怒責之太祖愧謝語在烈祖四王傳太祖竟陰奪哈撒兒百姓二千六百人太后以爲憂未幾而崩世祖至元三年定廟制世次追上尊諡祔烈祖廟

太祖光獻翼聖皇后宏吉刺氏名孛兒台旭眞亦曰孛兒帖兀眞父曰特薛禪太祖幼時烈祖攜往舅氏家乞婚與特薛禪遇特薛禪奇太祖儀表曰昨夢白海青挾日月飛集吾掌今是子面澤目光殆其祥耶遂以后許焉留止其家時年九歲無何烈祖將沒乃使明里也赤哥召還及太祖成立而有泰赤烏之難旣免特薛禪乃以后歸頌之太祖爲蔑里乞所襲掠后去當兵至時有媪聞兵馬聲震動亟呼太后及太祖兄弟乘馬逸后無馬藏牛車中馳至

山中軸折故爲所獲太祖尋乞克烈札荅刺兵往攻得后以歸與札荅刺共屯歲餘太祖與其酋札木合有違言后聞之趣太祖速行遂成大業明里也赤哥及其子帖卜騰格理恃寵欲害太祖諸弟俄見翦除后之力也后生太宗及朮赤太子察合台太子拖雷太子元起塞外無城郭宮室襲遼制名大帳所屯曰斡兒朵凡太祖后妃四十餘人分居四斡兒朵后與忽魯渾皇后闊里架担皇后脫忽斯皇后帖木倫皇后亦憐眞八刺皇后不顏渾秃皇后忽勝海妃子同居大斡兒朵終元世宏吉刺氏女爲后者十八人男尙主者十一人尊顯莫比皆啟於后憲宗二年崩世祖至元三年追上尊諡曰光獻祔太祖廟武宗至大二年加諡翼聖

忽蘭皇后兀洼思蔑里乞氏太祖征蔑里乞后父荅亦兒兀孫降納女於帝最有寵帝征回回數年皆從后與哈兒八眞皇后亦乞

刺真皇后脫忽茶兒皇后也真妃子也里忽禿妃子察真妃子哈刺真妃子同居第二斡兒朵

也速皇后塔塔兒氏亦曰也遂父曰也客扯連始太祖克塔塔兒納也客扯連女也速干爲夫人有寵夫人因極言姊美太祖求后至夫人遂以位讓之尋封爲后而也速干復爲夫人十四年太祖將征回回后請曰兵危事也皇帝遠涉山川諸子皆將兵遠征脫有不諱誰爲嗣者帝驚曰此大事汝乃慮及此耶於是遂定嗣太宗久之從征西夏太祖道獵墮馬違豫后與舊臣阿朮魯力勸班師太祖必欲滅夏雖不從而心以爲忠旣克夏乃以戰功厚賜阿朮魯而盡以其百姓賜后是年太祖崩后與忽魯哈刺皇后阿失倫皇后禿兒哈刺皇后察兒皇后阿昔迷失失皇后完者忽都皇后渾魯忽歹妃子忽魯灰妃子刺伯妃子同居第三斡兒朵

也速干皇后白夫人進位又有合荅安皇后遜都思氏亦曰忽荅罕泰赤烏人瑣兒罕失刺之女也初太祖爲泰赤烏所執械諸其家后與其兄沈白赤老溫善待之旣而太祖復匿其家氈車中索者至后曰天暑如此焉有人能藏於氈車者乎遂脫太祖於難及帝擊破泰赤烏后望見帝亟呼焉帝使人問之自言我合荅安也夫爲大軍所執故冒死求救帝遽命釋其夫則已死矣乃以舊恩納焉二后與哈荅皇后斡者忽思皇后燕里皇后禿干妃子完者妃子金蓮妃子完者台妃子奴倫妃子卯金妃子鎖郎哈妃子同居第四斡兒朵公主皇后者完顏氏金廢帝衛紹王女也太祖九年圍金中都三月金主遣使求和議婚公主竝大臣爲質乃遣使詣金選女時金諸帝公主見在者七人惟衛紹王女小岐國公主最慧麗使者以爲請金主許之使者遂拜公主於階下而請公主

北嚮其國遙拜主不敢拒於是金人送主來歸竝賧以護駕將十人細軍百人童男女各五百采繡衣三千御馬三千匹金寶稱是儀甚盛公主母欽聖夫人袁氏亦隨至焉班師歸國人耀之皆曰公主皇后也十七年邱處機徵詣行在時目爲神仙過和林奉大皇后旨過河漢夏兩公主皇后皆遣送寒具等食漢公主卽金公主未知其名當居何斡兒朶夏公主本名察合太祖四年征西夏夏主安全所獻女也史亦不見其名名有異同故未悉也凡斡兒朶歷世相傳兵衛財蓄領以皇子閒以其帝后妃守之如漢唐奉園陵故事諸帳勢位均敵無嫡庶上下之分惟妃稍次於后焉太宗孛刺合眞皇后失其氏無子諡闕昭慈皇后乃馬眞氏名脫列哥那故曰脫列哥那六皇后生定宗及闊端太子曲出太子曲出太子伐宋薨於師太宗育其子失烈

門於宮中號爲太孫命嗣立帝崩后召中書令耶律楚材問宜立楚材言宜如遺詔后不從遂稱制於和林者四年后不明大體好聚斂舉錯任情賴楚材匡救梏其已甚及定宗卽位而朝政猶出於后時楚材已歿左右益肆朝野離心矣事具在本紀中其年崩至元三年追上尊諡耐太宗廟太宗又有昂灰二皇后乞里吉忽帖尼三皇后秃納吉納六皇后業里訖納妃子太祖時征蔑里乞掠脫脫子霍都妻以與太宗未知誰是也昂灰二皇后太宗在潛邸時撫育憲宗爲子合失大王其所生也乞里吉忽帖尼皇后自定宗崩憲宗遷之於涼州西涼州闊端太子分地也定宗欽淑皇后失其氏名斡兀立海迷失帝崩后以太孫失烈門臨朝聽政者二年先是昭慈皇后舍太孫立定宗至是后援太宗舊命擁太孫稱制而諸王大臣頗有向背憲宗遂以親藩入踐大

元書 卷二十六  
位憲宗立二年遂誣后與失烈門母厭禳乃遷失烈門於沒脫赤而弑后及失烈門母竝死焉至元三年追上尊諡祔定宗廟  
憲宗母顯懿莊聖太后克烈氏名唆魯忽帖尼一曰莎兒合黑塔尼父曰札阿紺孛克烈王汗弟也克烈破獻女請降太祖納其長曰亦八哈爲夫人後以賜朮赤台而以其少與拖雷太子卽后是也生憲宗世祖旭烈兀大王阿里不哥大王末哥大王后有明鑑拖雷太子以太宗四年薨八年分賜眞定八萬戶爲食邑后請於太宗以布魯海牙爲眞定達魯花赤爲政廉平眞定德之世祖卽位后收眞定金銀以賞推戴功臣而是時王文統爲中書平章政事新行鈔法必以金銀爲本眞定無金銀則鈔不可得也會布魯海牙復宣撫眞定爲言於王文統而降之鈔民賴以便其能知人如此中統末崩至元三年尊皇考爲睿宗竝上尊諡曰莊聖祔睿

宗廟武宗至大二年加諡顯懿

憲宗火里差皇后太宗爲所娶火魯刺思女也憲宗立爲皇后崩年闕

貞節皇后宏吉刺氏名忽都台特薛禪孫忙哥陳女也早崩至元三年追諡祔憲宗廟

也速兒皇后貞節妹也繼爲皇后又有出卑三皇后從憲宗南伐憲宗崩之歲亦殂於六盤又有明里忽都魯皇后亦乞列氏昌王孛秃孫女也父瑣兒哈尙太宗子曲出太子女安秃公主后爲主出泰定三年詔守班秃營帳云

世祖帖木倫大皇后宏吉刺氏未知誰女也居大斡兒朵崩年闕昭睿順聖皇后宏吉刺氏名察必濟甯王按陳女也侍帝潛邸生太子眞金帝卽位中統三年立爲后至元十年授冊寶元世冊禮

自后始尋上尊號曰貞懿昭聖順天睿文光應皇后后性仁而明達當憲宗時帝以皇弟奉命南征軍鄂州而憲宗崩於蜀帝母弟阿里不哥守和林謀自立遂使其黨阿藍荅兒乘傳發兵去開平僅百餘里后使人問曰發兵大事太祖皇帝曾孫眞金在何故不令聞知阿藍荅兒不能荅尋聞其黨脫里赤至燕南僉民爲兵乃密使馳報帝亟還國事始定居數歲后聞怯薛官請割京城外地牧馬帝已允方以圖進后欲諫乃先責太保劉秉忠曰汝漢人明達者言則帝聽何爲不諫向初定都時規其地牧馬可也今軍民分業已定奈何奪之帝默然事遂寢后嘗取太府繒帛各一帝謂此軍國所需非私家物也后自是率宮人親執女工拘諸舊弓弦練之緝爲紬以爲衣其鞞密過綾綺宣徽院羊臠皮棄不用后令縫爲地毯先是帽無前簷帝出射苦日景炫目后乃剗益之帝喜

命爲式又製一衣前有裳無衽後長倍前無領袖綴以兩襍名曰比甲以便騎射時多做倣焉其勤敏如此十三年宋平幼主入朝大宴歡甚惟后不懌帝怪問之對曰自古無千歲之國毋使吾子孫至此幸矣帝以宋府庫故物陳列殿庭召后視之后視卽去帝追問欲何取后曰此宋人以遺子孫子孫不能守我何取乎宋太后全氏至大都不習風土后爲奏俾還江南帝曰爾婦人無遠慮若彼至江南浮言一動卽廢其家非所以爲愛也苟愛之存卹可也后自是益厚待焉十八年崩成宗卽位追上尊諡耐世祖廟后居第二斡兒朵喃必皇后者亦宏吉刺氏納陳孫仙童女也至元二十年納爲皇后繼居第二斡兒朵時帝春秋高后頗預政大臣每不得見帝輒因后白事焉生子鐵蔑赤崩年闕又有塔刺海皇后奴罕皇后居第三斡兒朵伯要兀眞皇后闕

倫皇后居第四斡兒朵又有速哥答思皇后八八罕妃子撒不忽妃子皆不知所居而速哥答思皇后泰定三年詔守世祖斡兒朵焉成宗母徽仁裕聖太后宏吉刺氏名曰伯蘭也怯赤明孝太子妃也先是世祖出獵道渴至一帳見女子緝駝茸從求馬湏曰馬湏固有之但我父母諸兄皆不在我女子難以與汝世祖欲行又曰我獨居此汝自來自去於理不宜我父母即歸益姑少待須臾果歸始出馬湏飲焉世祖既去歎息曰此女倉猝知禮若是豈非佳婦耶後諸臣請擇太子妃俱不當上意有老臣嘗從上獵知此事且聞未字具白世祖世祖大喜即爲太子取焉妃事中宮孝謹不離左右起居服御無纖介煩猥不周至世祖嘗歎其賢一日世祖幸東宮視太子疾見織金臥褥責曰我嘗賢汝何奢靡如此耶妃跪對曰常時不敢用今以太子病暫用禦溼耳請即徹之太子先

世祖薨世祖崩皇孫即位是爲成宗尊皇考爲裕宗尊母爲皇太后設官屬置徽政院然不好私利院官有受浙西田七百頃籍於位下太后曰江南率皆國家所有何必私田且我一寡婦人焉用是即命盡易受獻諸官后有弟既朝求官后曰汝非其人也勿以累我其後被黜人皆服后之公大德四年崩祔葬先陵上尊諡曰裕聖皇后祔裕宗廟武宗至大三年加諡徽仁后生成宗及晉王甘麻刺及荅刺麻八刺太子晉王生泰定帝荅刺麻八刺太子生武宗仁宗元自成宗後諸帝皆后子孫也后爲武宗仁宗少時擇師得布衣李孟世尤稱其知人云

成宗貞慈靜懿皇后宏吉刺氏名失憐荅里萬戶斡羅陳尙囊加眞公主所出也侍帝潛邸爲元妃生皇子德壽帝未即位薨帝踐阼元貞元年立伯岳吾氏爲皇后名卜魯罕駙馬脫里忽思之女

也大德三年上冊寶帝連年多疾后居中用事其時小人亦多因緣以進頗滋人言然能信相臣合刺合孫大政無闕故大德之治號爲綏靜皆后裁決京師建天壽萬甯寺后嘗幸之見中塑秘密佛像其形醜怪后以帕蒙面過卽命毀之省院臺臣奏上尊號帝不允車駕幸上都后復請帝曰我病日久國家大事多廢不舉暇理此耶事遂寢后以皇太子德壽幼忌武宗兄弟故出仁宗於懷州而德壽薨已而帝崩后遂欲援立安西王阿難荅而已臨朝稱制仁宗自懷州入殺安西王遂并構后以私通事竄之東安州害之武宗立於是尊元妃爲皇后追上尊諡祔成宗廟

武宗母昭聖元獻太后宏吉刺氏名荅吉又曰荅己濟甯王按陳孫渾都帖木兒女也初世祖以女侍郭氏賜荅刺麻八刺太子後乃納后爲妃生武宗仁宗屬成宗有疾武宗方總兵北方成后遂

出后及仁宗於懷州已而成宗崩成后欲立安西王阿難荅右丞相合刺合孫陰使人召仁宗后與仁宗遂奔還京師入內哭復出居舊邸朝夕入奠遂靖內亂而迎武宗語在武宗紀中是時諸王大臣頗有欲仁宗卽正位號者仁宗不聽后以兩子付陰陽家推其星命對曰重光大荒落有災旃蒙作噩長久重光爲武宗生年旃蒙爲仁宗生年也於是后頗惑其言遣近臣朵耳告武宗曰汝兄弟二人皆我所出豈有親疎陰陽家所言運祚修短亦不容不思也武宗默然徐進親臣康里脫脫言曰我捍北邊十年之勞又序居長神器所屬灼然何疑今太后以星命休咎爲言天道茫昧誰能豫知設使我設施上合天心下副民望則一日之短亦足垂名萬年何可以陰陽家言而乖祖宗之法哉此蓋近日任事之臣擅權專殺畏我治罪故爲是謀以搖動大本耳汝爲我往察而疾

元書 卷二十六  
歸報武宗既遣脫脫卽親帥大軍南來脫脫見后以聞后愕然曰我爲太子遠慮所以深愛太子也太子既爲此言不速來何爲既而后及仁宗屏左右語脫脫曰太子天性孝友中外屬望今聞汝所致言殆有讒間汝歸速爲我彌縫闕失使我骨肉無閒相見怡愉是則汝之功也武宗既卽位卽日尊爲皇太后未幾立仁宗爲皇太子而尊皇考爲順宗是年冬朝於隆福宮上皇太后冊寶至大元年爲太后建興聖宮當武宗鎮守邊陲太后嘗以振旅親禱於五臺山明年遂親幸五臺修佛事荅靈貺武宗亦孝敬無方殫崇禮制詔駙馬高麗王璋從侍鑾輅備宿衛復立興聖宮江淮財賦總管府主輸入三年又以興聖宮鷹房等戶四千分處遼陽建萬戶府統之是年十月帝率皇太子諸王羣臣上徽號曰儀天興聖慈仁昭懿壽元皇太后越日太后敬謝太廟武宗爲赦天下仁

宗踐位加上尊號曰全德泰甯福慶皇太后英宗初立尊爲太皇太后復加上尊號曰徽文崇祐太皇太后是日御大明殿受朝賀越日禮成復告廟元世皇后自非臨朝雖儷宸極其光耀莫有比焉后初以仁儉聞宮女皆教治女功每幸上都必敕鷹房衛士先往毋傷民稼然性敏給有權數厯養三朝威福已出羣奸附導遂日不檢內則買驢母亦烈失八用事外則幸臣失列門紐鄰及丞相鐵木迭兒怙寵作非濁亂朝政仁宗每恐傷太后意容忍不窮問后又以武宗子明宗有英氣恐難制而英宗幼弱爲羣小所利故欲仁宗立英宗爲皇太子及英宗既立太后来賀太后有所私庇英宗卽毅然見於辭色太后不懌而去曰我不擬養此兒邪遂飲恨成疾失列門等希太后意欲謀廢立英宗亟誅羣倖疏鐵木迭兒而後秕政稍革然奸黨牢固卒貽南坡之禍皆太后啟之太



后以至治二年崩明年上尊諡祔順宗廟

武宗宣慈惠聖皇后宏吉刺氏名眞哥千戶進不刺女也至大三年冊爲皇后無子仁宗皇慶二年立長秋寺掌皇后宮政秩三品泰定四年崩追上尊諡

莊獻嗣聖皇后亦乞列思氏名壽童父曰鎖郎哈尙安西王女奴兀倫公主后主所出也初爲武宗妃生明宗天祚二年追上尊諡仁獻章聖皇后至正六年改上諡號

文獻昭聖皇后唐兀氏亦武宗妃也生文宗天祚二年追上尊諡初宣慈惠聖皇后雖上尊諡而以無子不爲立主於是武宗廟久虛配后順帝元統二年乃集羣臣議之是時右丞相伯顏以帝明宗子也欲以明宗母祔皇太后文宗后也欲以文宗母祔伯顏難之太常博士遂魯曾獨言宣慈惠聖皇后在武宗朝已膺玉冊則

爲武宗皇后明文二母后固皆妾也今以無子之故不爲皇后立主而以妾后爲正宮是爲臣而廢先君之后爲子而追封先父之妾也昔慕容垂追廢其嫡母而后其生母以配先王爲萬世笑竊謂前失未可蹈也於是乃以宣慈惠聖皇后祔武宗廟武宗又有速哥失里皇后哈兒只女宣慈惠聖皇后從妹也又有完者歹皇后失其氏至大中又有妃洪氏最寵專房七夕結彩樓於臺設鬪巧宴諸妃嬪不得與又常於中秋月夜與眾嬪御泛太液池池設女軍衣幟詭麗有輅妃者善歌舞起爲帝謳月照臨之曲酒酣下令水戰爲戲風旋雲轉夜分乃罷太液池在萬歲山北舊名瓊花島云武宗后妃侍從各有定制后侍從二百八十人皆冠步搖泥金帽衣翻鴻獸錦袍妃侍從二百人皆冠懸梁七曜巾衣雲肩絳繒袍宮中制五雲車車有五箱以火樹爲檻軾烏棧爲輪轆飾以

明珠寶玉覆以五色錦繡帝坐其中外四箱爲妃嬪坐每晦夜游幸苑中御此以行不用燈燭元自世祖以來宮闈氅酪不染華風成宗多疾佚游尚簡自武宗始效金明昌故事頗好游宴順帝遂以荒樂亡國武宗爲之先導也

仁宗莊懿慈聖皇后宏吉刺氏名阿納失舍里亡其世系生英宗皇慶二年冊爲皇后遣官祭告郊廟改典內院爲中政院秩正二品先仁宗崩史失其年延祐七年英宗卽位追上尊諡祔仁宗廟仁宗又有荅里麻失里皇后失其氏

英宗莊靜懿聖皇后亦乞列氏名速哥八刺父昌王阿失尙成宗女亦里哈牙公主后主出也至治元年冊爲皇后泰定四年崩追上尊諡順帝後至元二年始祔英宗廟英宗又有牙八忽都魯皇后朵兒只班皇后事竝闕

泰定帝母宣懿淑聖太后宏吉刺氏名普顏怯里迷失晉王甘麻刺納爲元妃生泰定帝泰定帝卽位尊皇考曰顯宗尊元妃爲皇后追上尊諡祔顯宗廟天祗初毀焉

泰定帝皇后宏吉刺氏名八不罕魯王按陳孫斡留察兒女也泰定元年冊爲皇后二年封后父斡留察兒威靖王初后侍帝藩邸生子阿速吉巴元年立爲皇太子帝崩皇太子立爲皇帝文宗弑之而徙后東安州安置東安多蛙朝夕聒噪后使人語之曰我避患於此何爾復不見憐耶自後屏息眾咸異焉泰定帝又有皇后七人亦憐眞八刺皇后亦乞列氏昌王阿失女亦里哈牙公主所出也帝嘗與后受佛戒於帝師撒荅八刺皇后乃馬眞氏帝姊壽甯公主女也泰定三年納之宮中先逝又有忽刺皇后也速皇后卜顏怯里迷失皇后失烈帖木兒皇后鐵你皇后俱失其氏又有

元書 卷二十一  
必罕妃子速哥答里妃子皆宏吉刺氏千戶買住韓之女買住韓  
尙拜荅沙大長公主者也天祿初俱安置東安州其時燕鐵木兒  
取泰定后爲夫人未知何后

明宗皇后乃馬眞氏名八不沙泰定帝甥壽甯公主女也侍潛邸  
生甯宗天祿二年明宗卽位於和林而文宗已正位大都自往迎  
帝至旺忽察都暴崩於是文宗復踐阼是年立甯徽寺掌明宗皇  
后宮事以鈔萬錠幣帛二千匹供焉后請以爲明宗資冥福命帝  
師率諸僧修佛事七日於大天源延聖寺道士建醮於玉虛天寶  
太乙萬壽四宮及武當龍虎二山至順元年復敕有司供后宮幣  
帛二百匹文宗皇后知后不平於旺忽察都遂與宦者拜住弒后  
順帝後至元二年祔明宗廟無諡

貞裕徽聖皇后罕祿魯氏實哈刺魯氏名邁來迪郡王阿昔蘭之

裔孫女也初明宗爲周王之漠北過哈刺魯納焉生順帝文宗旣  
潛害明宗復以順帝長忌之乃揚言非明宗子也事具本紀后崩  
年闕順帝卽位後至元二年始追上諡號或曰明宗納故宋主瀛  
國公之姬非事實也明宗又有按出罕皇后月魯沙皇后不顏忽  
都皇后野蘇皇后脫忽思皇后後常以脫忽思后主明宗帳殿至  
順二年分湘潭四萬戶爲湯沐然文宗世但稱曰娘子不稱后云  
文宗皇后宏吉刺氏名卜荅失里父魯王瑯阿不花尙順宗女魯  
國大長公主后主所出也天祿元年冊爲皇后后以銀五萬兩助  
建大承天護聖寺至順元年以籍沒張珪田四百頃賜寺爲永業  
生阿刺忒納荅刺燕帖古思太平訥阿刺忒納荅刺初爲燕王尋  
立爲皇太子月餘薨已而文宗崩燕鐵木兒請立燕帖古思后以  
文宗遺命立明宗子乃立甯宗是冬尊后爲皇太后御興聖宮受

朝賀逾月甯宗復崩后復遣人迎順帝於靜江明年卽位元統元年置徽政院設官三百六十員二年上尊號曰贊天開聖仁壽徽懿昭宣皇太后後至元二年復上尊號曰貞文慈佑儲善衍慶福元太皇太后仍稱制臨朝后敏譎善攬權勢方朝議尊爲太皇太后參執政事許有壬諫以爲非禮不聽時南臺御史秦不花亦奏叔母不宜加徽稱后初怒徐賜金幣以旌其直及六年順帝知明宗被弑遂以文宗義不戴天徹其廟主竝削后尊號安置東安州尋崩甯宗七歲卽位立未逾歲而有宏吉刺氏皇后至正二十八年崩耐甯宗廟古未有也

順帝皇后伯牙吾氏名荅納失里太師太平王燕鐵木兒女也順帝卽位納爲皇后元統二年授冊寶帝立非燕鐵木兒意而后頗有寵然后性媚黷貨時立鹽局官自鬻鹽后亦命宦者孛羅取鹽十萬引入中政院帝又命發兩艘船下西番爲后營利後至元元年后兄左丞相唐其勢與太師伯顏爭權坐謀逆誅后弟塔刺海逃入宮匿后坐下后以衣蔽之左右曳出斬首血濺后衣伯顏奏曰豈有兄弟爲逆而后黨之者遂竝執后后呼帝曰陛下救我帝時亦惡后驕妬乃曰汝兄弟爲逆豈能相救耶於是遷出宮伯顏尋醜后於開平民舍

皇后宏吉刺氏名伯顏忽都父曰孛羅帖木兒後至元元年伯牙吾后爲伯顏所醜正宮闕位帝意在伯顏忽都明年乃先封孛羅帖木兒爲毓德王三年遂冊爲皇后爲后置資正院后生皇子眞金二歲而夭而性簡重節儉動中禮法待妾媵太子皆有恩時第二皇后奇氏有寵居興聖西宮帝希幸東內左右以爲言后意無纖芥從帝如上都次中道一夕帝欲臨幸使內官馳告后辭曰暮

夜非至尊往來之時中使往復者三竟不納帝益賢之至正十四  
年后母歿帝頗加禮賻鈔三百錠后居坤德殿終日端坐未嘗妄  
踰戶闕二十五年崩年四十二奇氏后見其所遺衣服敝壞大笑  
曰正宮所服何至此耶其樸素可知矣逾月皇太子自太原歸哭  
之甚哀

皇后肅良合氏本奇氏也高麗人其家微故事高麗國歲獻女迄  
後內自宮闈外至大家貴宦無不有高麗女子者高麗國中亦多  
苦之高麗女多慧嫵善服事人后以徽政院使禿滿荅兒進爲宮  
女主供茗飲尋大寵幸生愛猷識理達臘太子時伯牙吾后方驕  
妬數笞辱之及后遇害帝欲立之丞相伯顏爭不可伯顏罷相學  
士沙剌班希旨請立爲第二皇后居興聖宮數歲監察御史李泌  
上疏曰世祖有誓不得與高麗女共事宗廟陛下踐世祖之位何

忍忘世祖之言乃以高麗奇氏竝位中宮今災異屢起河決地震  
盜賊滋蔓皆陰盛陽微之象乞仍降爲妃庶幾三辰定位災異可  
息不報后性穎黠亦務自矯飾無事則日取女孝經史書訪問歷  
代皇后之有賢行者爲法四方貢獻珍味必先薦太廟然後敢食  
京師嘗大飢后命爲粥食之又出金銀粟帛令宦者朴不華於都  
城十一門置冢瘞遺骼十餘萬復命僧建水陸大會度之中外頗  
稱其賢太子旣長帝建端本堂命儒臣侍講讀而帝與太子皆受  
佛戒帝師因啟后曰太子向學佛法頗開悟今乃使習孔子教恐  
壞真性后曰我雖居深宮不明道德然嘗聞自古及今治天下者  
必用孔子道佛法雖可出世不可治天下安可使太子不讀儒書  
帝師慙退然后遂自命正肅而帝日習荒樂至以番僧出入宮中  
穢德日彰后遂與太子謀內禪使朴不華諭意丞相太平不荅復

召太平至宮舉酒賜之再申前說太平亦無言帝徐知后意怒疏之兩月不見后自是遂盜威柄朴不華因后寵幸既有罪被劾后諷御史大夫佛家奴爲之疏辯佛家奴益欲劾之后卽反喉御史劾佛家奴謫居潮河自后得幸奇氏之族在高麗者怙勢橫甚高麗王怒殺之后謂太子曰汝何不爲我復讎耶遂立高麗王族人留京師者爲王以兵萬人送之國大敗而還事具高麗傳旣而太子與孛羅帖木兒構孛羅帖木兒遂舉兵入京師太子出奔冀甯孛羅帖木兒言后外撓國政宜遷出於外帝弗聽遂矯制幽后於諸色總管府未幾遁后還宮取印章爲書以召太子而復幽之后數納美女求脫又許妻以公主孛羅帖木兒尙以箴送爲遲乃令先嫁女而後爲箴具始釋還宮旣而孛羅帖木兒誅擴廓帖木兒送太子還后又密令以重兵擁太子入京師脅帝禪位賴擴廓

帖木兒不從而止是時宏吉刺皇后崩中書省遂言后宜正位中宮又奏改資正院爲崇政院兼主中政院帝初不許俄亦授冊寶進王奇氏三世而以奇氏爲肅良合氏詔天下從高麗爲稱也二十八年明兵入大都從帝北奔順帝多內嬖佩貴妃印者不下數十最寵者七人曰龍淑妃尤侈曠帝賜繒綺珍異動鉅萬計妃令宦者貨於左掖門內京師巨室富賈售者輻輳名曰繡市帝尤有精思於內苑造龍船以內宮供奉少監塔思不花監造帝自製船式首尾長百二十尺廣二十尺前瓦簾棚穿廊兩暖閣後吾殿樓子龍身竝殿宇用五綵金妝前有兩爪上用水手二十四人身衣紫衫金荔枝帶四戴頭巾於船兩旁下各執篙一船行則龍首尾眼爪皆動每乘以泛月池池上起浮橋三又各爲三洞洞上結綵爲飛樓樓上置女樂橋以木爲質飾以錦繡九洞不相直達每上

元書 卷二十六  
巳日令諸妃嬪被於內苑漾碧池池用紋石爲質以寶石鏤成上覆紫雲九龍華蓋四面施錦幃跨池三石橋上結錦爲三亭又設一橫橋接三亭之上以通往來禊畢則宴飲於中池旁有香泉潭是日積香水注池中令妃嬪浴焉又飾爲七寶莊嚴時以宮女三聖奴妙樂奴文殊奴等十有六人按舞名爲十六天魔首垂髮數辨戴象牙佛冠身被纓絡大紅綃金長短裙金雜襖雲肩合袖天衣綬帶鞋襪各執加巴刺般之器內一人執鈴杵奏樂又宮女一十一人練槌髻勒帕常服或用唐帽窄衫所奏樂用龍笛頭管小鼓箏箏琵琶笙胡琴響板拍板以宦者長安迭不花管領遇宮中讚佛則按舞奏樂宮官受秘密戒者得入餘不得與恆舞酣歌夜以繼日遂至亡國

論曰魏氏源言古昔定陰陽之職嚴宮闈之名分猶世有姐褒呂趙武韋之禍元沿朔漠之俗泯嫡庶尊卑而撓國枋覆皇綱者卒鮮惟以氈帳醜俗質勝其文也然自古及今未有宮闈不肅而天下治者也元代開國以宣懿之英毅昭睿順聖之慈明降至武仁不能免倣筭之刺遂釀長萬之亂東方朔云淫亂之漸其變爲篡豈不信哉況國之將亡雖有伯顏忽都后之盛德而無補也何則順帝雖不至大無道而荒淫已甚治妾驕子欲以干位遂至將相相圖紀綱大壞此天下所以土崩瓦解也故頗錄當時後房瑣事以爲戒焉

湘鄉張國彥

金城刊

曾紀仁

門人曾廣冀襄校

門人曾士琮詳校

元書卷二十六

元書卷二十七

邵陽曾廉撰

始祖以來諸族列傳第二

始祖孛端叉兒母兄二人曰博寒葛荅黑亦曰孛完合荅吉亦曰  
 不忽合荅吉曰博合覩撒里直亦曰孛合撒赤亦曰不合禿撒勒  
 只或曰三人實其母阿蘭果火一乳三子也博寒葛荅黑尙有兄  
 二人曰別勒古訥台曰不古訥台兄弟實五人孛端叉兒立帳於  
 統吉里忽魯實其兄資之兵事在太祖紀孛端叉兒父脫奔咩里  
 斡亦曰朵奔蔑兒干其後曰朵魯班亦曰朵兒邊曰朵里別歹氏  
 別勒古納台不古訥台後皆名爲氏博寒葛荅黑後爲哈荅斤氏  
 亦曰合塔斤曰杭斤氏博合覩撒里直後爲散勒兀惕氏又曰散  
 只兀氏太祖初歲朵魯班哈荅斤散只兀合泰赤烏共立札荅刺



酋札木合爲汗以敵太祖札木合敗哈答斤散只兀又合於乃蠻乃蠻亡乃來歸後散只兀又稱爲珊竹氏亦曰珊竹臺氏亦曰散朮台氏圖魯華察純只海紐璘皆其後也圖魯華察以武勇稱子曰吾也而及紐璘皆有傳純只海太祖時弱冠備宿衛從征西域有功太宗命佩金虎符充益都行省軍民達魯花赤復從大將太赤破徐州徙鎮懷孟是時王榮同純只海守懷潛謀叛因伏甲執純只海斫其足以帛緘其口純只海妻喜里伯倫率眾自榮家奪出馳旁郡請兵討榮殺之朝廷遣使錄榮妻孥貲產盡賜純只海竝欲盡戮懷民萬餘口純只海爲之力請得免竝給榮妻孥券放爲民而以其宅爲官廨秋毫無所取懷人德之未幾入覲太宗賜之第於和林以疾卒詔陪葬山陵皇慶初贈推忠宣力功臣金紫光祿大夫上柱國溫國公諡忠襄加贈太傅定西王易諡曰武穆

子大達立昂阿刺大達立以平襄漢功至顯官

始祖子三人長八林昔黑刺禿合必蓄亦曰把林失亦刺禿合必赤太祖十世祖父也次曰巴阿里台始祖虜妊婦生插只來者所生也次曰沼列兀台始祖納媵女爲妾所生也巴阿里台亦曰巴阿里歹子曰赤都忽勒孛闊後爲蔑年八鄰氏亦曰巴阿鄰氏太祖時有豁兒赤兀孫闊闊搆思其後也三人皆自札荅刺來歸豁兒赤識牛鳴語在札荅刺傳太祖卽大位以爲萬戶使鎮守也兒的石河林木中百姓其後以索女於吐麻吐麻怨之遂叛執豁兒赤囚之朶魯伯擊破吐麻乃得還太祖竟與豁兒赤吐麻女子三十人兀孫後爲別乞太祖使乘白馬著白衣坐黑人上太祖以兀孫忽難闊搆思迭該皆盡忠敢言故禮重之闊闊搆思亦曰闊客搆思後太祖使保察合台太子又有失兒古額禿二子曰阿勒

黑曰納牙太祖破泰赤烏失兒古額禿禽其官人塔兒忽台乞鄰勒禿將獻於太祖納牙止之語在泰赤烏傳太祖卽大位以納牙爲中軍萬戶皆巴阿鄰氏也亦曰把林太祖旣破克烈把林來降是也後又稱八鄰氏或曰丞相伯顏是其裔然伯顏與安童爲婚當是八鄰人而非其種族也沼列兀台亦曰沼兀列歹後爲沼兀列亦惕氏亦曰召烈台氏亦曰照烈太祖時照烈部長曰玉律屬於泰赤烏而不堪其虐以居與太祖近因獵遇焉太祖約之同宿舉飲食與共之明日再合圍又驅獸與之玉律之人乃私相語曰泰赤烏與我亦兄弟而常攘奪我無君人之度不如鐵木眞太子可依也於是玉律及塔海塔魯將擊泰赤烏以自效太祖曰我方熟寐幸汝覺我自今車轍人迹之塗當盡奪以與汝矣已而爲泰赤烏部人所殺照烈遂亡其部人事太祖者曰抄兀兒亦曰抄吾

兒泰赤烏諸部之立札木合爲汗也將潛圖太祖抄兀兒知其謀馳以告太祖因賜號荅刺罕子那眞世祖時爲也可札魯花赤子伴撒孫火魯忽世其官

八林昔黑刺禿合必蓄子曰哱撚篤敦亦曰蔑年土敦太祖九世祖父也子七人長曰旣孛都兒罕亦曰合赤曲魯克太祖八世祖父也次曰合臣次曰合赤兀次曰合出納次曰合赤溫次曰合蘭歹次曰納眞亦曰納眞八都亦曰納臣把阿禿兒哱撚篤敦旣旣孛都爾罕兄弟六人皆爲押刺伊而所殺盡掠其家事在太祖紀是時惟納眞贅於八刺忽聞家難而僞爲牧馬者之押刺伊而路逢二騎臂鷹而獵納眞心識之曰吾兄鷹也復前行至一山下有馬數百亦其兄馬也然惟數童子牧之納眞於是乘隙盡紿殺其人臂鷹驅馬而還旣孛都爾罕子海都後復立爲君納眞之力也

其後合臣子名那牙吉台爲納牙勒氏亦曰納牙乞太祖時有種  
節自札荅刺來歸其裔也合赤兀子曰巴魯刺台爲巴魯刺思氏  
亦稱八魯刺解太祖時速忽憐禪合刺察兒忽必來忽都思其裔  
也合刺察兒後太祖使保察合台太子忽必來名列於開國四先  
鋒自有傳合出納四子後皆以名爲氏爲大巴魯刺小巴魯刺額  
兒點圖巴魯刺脫朵顏巴魯刺氏合赤溫子曰阿荅兒歹後爲阿  
荅兒斤氏合蘭歹子爲不荅安惕氏納眞四子曰兀魯兀台亦曰  
兀魯兀歹亦曰兀魯兀惕曰忙兀亦曰忙忽台亦曰忙忽惕曰失  
主兀歹曰朵豁刺歹皆以名爲氏兀魯兀台忙兀二氏知名者朮  
赤台畏荅兒自有傳忙兀氏又有哲台多豁思太祖以哲台爲火  
兒赤後使保拖雷太子焉

海都太祖七世祖父也子三人長曰拜姓忽兒亦曰伯升豁兒多

黑申太祖高祖父敦必乃之父也次曰察刺合甯兒亦曰察刺孩  
領忽刺曰獠忽眞兀秃迭葛亦曰抄眞斡兒帖該察刺合甯兒子  
二人長曰直孛斯亦曰想昆必勒格直孛斯子曰咸補海爲泰赤  
烏氏自有傳次曰別速台後爲別速氏迭該窟出沽兒抄兒哲別  
其裔也窟出沽兒亦曰古出古兒主修造車馬後與迭該俱爲千  
戶哲別自有傳獠忽眞兀秃迭葛子六人長曰斡羅納兒次曰晃  
豁壇次曰阿魯刺惕次曰雪你惕次曰合卜秃兒合忽次曰格泥  
格思皆以名爲氏斡羅納氏亦曰斡刺納兒氏曰斡魯納台氏其  
裔只兒豁安乞失里阿朮魯阿朮魯自有傳乞失里亦曰啟昔禮  
牧馬於也客扯連家也客扯連叛入克烈謀潛襲太祖乞失里與  
僚牧巴歹聞之走告其謀太祖因得爲備克烈滅太祖以王汗金  
撒帳及金器盡與之後又以爲千戶賜號荅刺罕復從太祖平西

域河西有功其曾孫合刺合孫亦別有傳一曰斡羅納氏又爲火里刺氏火魯刺思氏始合於札荅刺後仍歸太祖者也晃豁壇氏亦稱晃火壇氏亦曰晃合丹氏曰晃豁塔歹氏烈祖時有明里也赤哥亦曰蒙力克額赤格隸帳下烈祖將崩太祖方九歲居宏吉刺德禪家烈祖使明里也赤哥迎之歸王汗之約太祖飲布渾察兒也明里也赤哥覺其詐力止勿往由是爲太祖所寵待太祖卽大位許免九死然自是遂驕恣子七人皆恃勢不逞一子闊闊出爲巫號帖卜騰格里託鬼物譖哈撒兒王於太祖後又窘辱斡噶那顏斡噶泣訴於太祖以力士拉帖卜騰格里脅殺之太祖以明里也赤哥有舊恩宣其父子之罪仍宥之又子曰脫命閣里必從征西域數立功脫命子曰伯八兒在忠節傳又有雪亦客禿速客客者該晃荅豁兒晃荅豁兒子四人曰速客該曰者温曰捏兀

歹曰察合安不洼皆晃豁壇族也太祖與札木合別居皆棄札木合來歸雪亦客禿後爲寶兒赤位千戶阿魯刺氏亦曰阿兒刺氏亦曰阿刺納氏其裔博爾朮自有傳格泥格思氏有忽難者後爲千戶太祖使保拖雷太子其裔也

拜姓忽兒子敦必乃太祖之高祖父也子二人長葛不律汗亦曰合不勒合罕太祖之曾祖父也次曰擣斡赤列擣斡赤列子曰不勒帖出把阿禿兒葛不律汗子七人長曰窠斤八刺哈哈亦曰八刺哈亦曰斡勒巴兒合黑次曰八里丹亦曰把兒壇把阿禿兒太祖之祖父也次曰忽都魯畔聶兒亦曰忽禿黑禿蒙古兒次曰忽魯刺汗亦曰忽都刺汗亦曰忽圖刺合汗次曰忽蘭八都兒次曰合丹八都兒亦曰合荅安次曰掇端斡赤斤亦曰脫端火兒眞亦曰脫朵延斡惕赤斤窠斤八刺哈哈在葛不律汗時多選勇士隨

之攻戰所向無敵因號主兒乞氏子曰忽秃黑秃主兒乞忽秃黑秃主兒乞亦曰月兒斤氏子二人曰辭徹別吉亦曰別及亦曰辭扯別乞曰辭徹大丑亦曰大疇亦曰台出亦曰秦出太祖與札木合析營時忽秃黑秃主兒乞與其二子俱來時忽魯汗歿秦赤烏驕族人欲立汗以統族眾太祖推別吉爲汗不受遂立太祖爲汗然別吉兄弟強盛太祖心頗畏之亦藉其勢爲聲援克烈王汗之弟札阿紺孛兒見迫於蔑里乞人太祖實請別吉大丑往殺其迫者未幾太祖會族人宴於斡難河上各以旄車載湏酪而前忽兒眞者別吉之母也野別該者別吉之次母也飲時諸族及忽兒眞其革囊以盛湏獨野別該異其囊忽兒眞怒不尊己而貴野別該也乃答太祖主膳者失邱兒遂有隙又會是時太祖弟別里古台主馬與別吉之主馬者播里忿爭刃傷別里古台背別里古台欲隱

其事而左右欲鬪因奪忽兒眞火里眞二可敦以歸別吉知其絀也因請和乃還二可敦然由是嫌怨益深太祖攻塔塔兒約別吉大丑共進兵遂不至既而太祖爲乃蠻所掠復徵兵會擊別吉又拘太祖所使六十人於合禮勒海上殺十人使五十人歸皆去其衣太祖積數不平遂帥師踰沙磧殺虜其部眾惟大丑僅以妻孥免越數月復伐之追至帖烈徒之隘滅之

忽都魯畔聶兒子曰播里亦曰不里孛闊亦曰不里孛可卽爲辭徹別乞主牧馬與別里古台忿爭者也播里素雄武自恃力出別里古台上太祖旣收主兒乞令播里與別里古台搏播里陽不勝別里古台竟折其脅死

忽魯刺汗嗣咸補海爲汗者也初葛不律汗沒咸補海嗣汗旣而爲塔塔兒所害部人復立忽魯刺爲汗忽魯刺興兵爲咸補海報

仇事具泰赤烏傳忽魯刺汗子三人曰搠只亦曰拙赤射殺札荅刺掠馬者也曰吉兒馬兀亦曰荅兒馬刺曰按彈亦曰阿勒壇又稱阿勒壇斡惕赤斤金太和二年太祖將伐塔塔兒誓師曰苟破敵逐北無取遺棄物俟事畢斂而散之旣戰按彈及火察兒荅里眞三人違誓太祖怒奪其所獲散之軍中由是怨太祖而叛附克烈札木合之間太祖於亦刺合三人實贊之曰我等當佐君討月倫諸子也於是亦刺合以爲蒙古已內離當立滅未幾太祖敗王汗遣阿里海賁之就令告按彈火察兒曰昔者吾國無主以別吉大丑實我伯祖八刺哈之裔欲立之二人固辭乃以汝火察兒爲伯父聶坤之子又欲立之汝又固辭然事不可中輟以汝按彈爲我叔祖忽都刺之子又欲立之汝又固辭於是汝等推戴吾爲之主耳不自意相迫至於如此也汝今善事王汗三河祖宗之地無

爲他人所有也皆默然不能言及王汗兵敗將亡按彈火察兒及札木合乃同謀殺王汗亦弗克遂奔乃蠻乃蠻亡按彈復來歸其後無聞

忽蘭八都兒子曰也客扯連初事太祖後與其子納鄰客延叛投克烈與亦刺合謀襲太祖克烈滅後不知所終

掇端斡赤斤初合於烈祖烈祖歿遂欲附泰赤烏太祖泣留之掇端斡赤斤曰深池乾矣堅石已碎留何爲者也竟帥眾去宣懿太后怒親追之驅其眾大半而還旣而亦去泰赤烏亡未知所終

八里丹子四人長曰蒙哥嗜黑顏亦曰忙格禿乞顏乞顏言其氏次曰聶坤大司亦止稱聶坤亦曰捏坤太子又次烈祖神元皇帝又次荅里眞一曰荅力台亦曰荅里台斡赤斤一曰荅阿兒台亦曰荅阿里台按斡赤斤蒙哥嗜黑顏子汪古兒亦曰翁古兒太祖

元書 卷二十一  
時爲千戶寶兒赤聶坤大司子火察兒事具按彈篇中乃蠻亡後  
不知所終

蒼里眞亦與按彈火察兒叛入克烈者及克烈滅蒼里眞獨來歸  
太祖以爲叔父也置不問子曰大納耶耶太宗時以甯海一萬戶  
爲蒼里眞官人食邑大納耶耶子二人曰小哥大王曰甯海王闊  
闊出卽以食邑爲號者也至元九年闊闊出請以甯海登萊自爲  
一路與諸王比歲賦惟入甯海無輸益都詔從之子曰也里干大  
王亦曰也里慳成宗命駐夏於晉王怯綠連之地以備北邊子四  
人曰哈魯罕王曰亦思蠻曰拔都兒曰阿海皆相繼爲甯海王拔  
都兒亦曰八朵兒延祐五年賜金印駝紐哈魯罕王子二人曰益  
王買奴曰阿魯大王初泰定二年中書省臣言山東陝西湖廣地  
接戎夷請議選宗室往鎮之明年詔以買奴爲宣靖王鎮益都賜

塗金銀印駝紐致和元年懷王據大都徵買奴於山東懷王立買  
奴往迎明宗於行在至順二年詔置王傅後至元二年進王益至  
正十六年毛貴陷益都買奴遁其後有益王渾都帖木兒禽老的  
沙誅之史失其世

論曰元國姓曰奇渥溫氏疾言之則曰卻凡曰歹斛台特帶惕皆  
聲之餘也亦稱孛兒只吉歹氏者秘史言巴塔赤罕生塔馬察塔  
馬察生豁達差兒蔑兒干豁達差兒蔑兒干生阿兀站孛羅溫阿  
兀站孛羅溫生撒里合察兀撒里合察兀生也客你敦也客你敦  
生擣鎖赤擣鎖赤生合兒出合兒出生孛兒吉只歹蔑兒干孛兒  
吉只歹蔑兒干生脫羅豁勒眞伯顏脫羅豁勒眞伯顏生朵奔蔑  
兒干卽脫奔咩里健妻曰阿蘭果火者也蓋自脫奔咩里健以上  
增多十世矣故曰孛兒只吉歹以名爲氏也此始祖以來諸族之

所同也其曰奇渥溫者蓋太祖祖父八里丹之氏也秘史言乞顏種人蒙格禿子翁古兒蒙格禿即蒙哥睹黑顏亦曰忙格禿乞顏綴氏在其下者猶之忽禿黑禿主兒乞亦氏在下也宏吉刺德禪禪以夢徵遇列祖以爲乞顏人吉兆也是八里丹以下爲乞顏氏之明證也乞顏緩言之則奇渥溫也然舊紀略其上而始字端又兒以比商契周稷推本於有娥姜嫄云爾子攷自始祖以來宗祿恩例實始自太祖叔父荅里眞官人餘皆不繫於屬籍且亦有屠滅者焉又各自爲氏若札刺兒竟莫詳其所出也然以其親連天家世不婚姻而國家命吾也而及紐璘制詞皆曰同姓則猶無忘葛藟之庇矣故錄自始祖以來至荅里眞爲之傳



元書卷二十七

湘鄉尹襄廷  
刊  
湘鄉彭翊綸  
門人曾紀培襄校  
門人曾士琮詳校

元書卷二十八

邵陽曾廉撰

塔塔兒泰赤烏札荅刺克烈蔑里乞乃蠻乞力吉思列傳第三  
塔塔兒二種曰按赤塔塔兒曰察罕塔塔兒按赤言打牲人也察  
罕言白也或曰四種未知其審居捕魚兒闊連二海閒兀兒失温  
河側而南至兀魯灰河遼史曰阻卜金史謂之阻鞞者是也亦曰  
祖卜朔方人內稱曰塔塔兒本皆達剌也以其最先通中土故擅  
此稱塔塔者達剌之異文也金熙宗時蒙古葛不律汗已寢強不  
肯服事金咸補海嗣汗金人乃使塔塔兒潛圖蒙古塔塔兒因僞  
與咸補海為婚襲而執之以獻於金於是蒙古舉兵復仇其時塔  
塔兒酋曰鐵木真亦竭力抗禦連十三戰而鐵木真竟為烈祖所  
獲太祖之名鐵木真以此也其後烈祖潛行過塔塔兒境塔塔兒

人識之陰置毒食中烈祖崩塔塔兒由是與太祖爲世仇久之蔑兀眞笑里徒爲酋太祖初稱汗蔑兀眞笑里徒從札荅刺酋札木合以兵侵太祖旣而蔑兀眞笑里徒叛金金承安元年左丞相完顏襄討之蔑兀眞笑里徒圍金副統姚里孛迭於怯綠連河襄引大軍至始解去走斡難河上爲金都統完顏安國所追襲會大雨衆散亂凍死十八九遂乞降已又復叛襄亦復泄師三年襄進師以逼之太祖遂約克烈酋脫里發兵夾擊之於斡難河攻陷其營斬蔑兀眞笑里徒盡獲其輜重而以大珠被及金銀縵車各一上之襄太祖及脫里皆受賞焉塔塔兒嗣酋曰阿刺兀都兒自是遂與太祖死鬪札木合之立爲汗也塔塔兒與泰赤烏諸部皆從札木合以圖太祖然卒大敗金泰和二年太祖旣滅泰赤烏遂征塔塔兒戰於荅闌捏木兒格思塔塔兒又敗追至兀魯灰河盡虜四

種之眾太祖以仇故將執其壯健者悉坑之而語泄塔塔兒遂走據山寨太祖復擊破之塔塔兒人袖刃待戮及被坑泄殺者亦多死於是塔塔兒壯健悉盡其幼弱皆奴蒙古焉

泰赤烏一曰泰亦赤兀惕居斡難河側其酋曰咸補海亦曰俺巴孩太祖從曾祖也世具始祖以來諸族傳初咸補海爲泰赤烏氏蒙古葛不律汗歿咸補海以從弟嗣位亦不服事金金使塔塔兒圖之適咸補海嫁女於塔塔兒親送至兀兒失温河遂爲塔塔兒所執獻之金而殺之於是忽魯刺爲汗是時咸補海有子十人長曰合荅安太子仍長泰赤烏部而忽魯刺汗興師爲咸補海復仇烈祖從忽魯刺汗屢敗塔塔兒兵久之士馬益盛合荅安畏烈祖之強而與之善旣而其弟塔兒忽台乞鄰勒禿用事遂有隙烈祖俄又崩太祖幼弱塔兒忽台乞鄰勒禿及脫朶延吉兒帖諸兄弟

元書 卷二十八  
欺太祖太祖往依之至起營竟舍太祖去而盡奪烈祖舊部數歲  
聞太祖英勇以兵執之並將加害賴其臣鎖兒罕失刺以免語在  
太祖紀中久之太祖勢復振而沆忽嗣長泰赤烏沆忽者亦合答  
安弟也一曰阿兀出把阿秃兒當是時哈答斤散只兀照烈札刺  
兒兀魯怛兀主兒乞皆泰赤烏同族也自忽魯刺汗歿皆復思咸  
補海之德仰附泰赤烏而沆忽以驕嗇失眾心遂多散去事札答  
刺未幾又多歸太祖太祖立爲汗泰赤烏乃大驚思欲立翦之以  
遂前計亦會札答刺酋札木合挑之遂與札木合集十三部之師  
以圖太祖太祖亦分兵爲十三翼以應之戰於答闌版朱思太祖  
頗失利沆忽益恃其兵強臨下無惠由是部眾益貳然太祖日益  
盛沆忽遂會諸部立札木合爲汗以兵來犯俄諸部皆敗去太祖  
遂乘勝進逼泰赤烏沆忽渡斡難河拒戰飛矢中太祖項然竟大

潰於是沆忽奔乃蠻泰赤烏遂亡是時塔兒忽台乞鄰勒秃爲其  
下失兒古額秃納牙父子所禽欲獻於太祖納牙曰我獻主以賈  
利罪也不如舍之遂舍塔兒忽台乞鄰勒秃而以告於太祖太祖  
義而用之

札答刺亦曰札答蘭一曰札赤刺歹居斡難河之西其酋曰札木  
合初始祖孛端叉兒虜一妊婦曰札只刺歹亦曰插只來旣生子  
卽以札只刺歹名之後爲札答刺氏札只刺歹生古土兀歹古土  
兀歹生不里不勒赤魯不里不勒赤魯生哈刺哈答安哈刺哈答  
安札木合之父也以其祖母嘗事始祖故亦曰太祖疏族札木合  
營於豁兒豁納黑主不兒國人立忽魯刺爲汗地也太祖少時與  
相善稱安答馬克烈王汗之援太祖伐蔑里乞也札木合以兵二  
萬人及王汗共渡勤勒豁河襲蔑里乞於辟靈哥河上走之師還

太祖遂與札木合同營止焉札木合爲人有口貌威亦頗示大度  
故人亦多信從之然結交不能持久又心多伎而賢愚無差等故  
豪傑不樂爲用及太祖與同營諸部與太祖處太祖親賢而尙能  
雄直無城府士遂傾心歸之札木合徐自知其弗如而陰忌太祖  
又以其嘗有德驕之太祖遂分離去不與同營矣太祖去從行者  
幾空其部未幾按彈火察兒辭徹別吉遂立太祖爲蒙古汗三人  
皆太祖之親而曾事札木合來歸者也太祖旣立使人告王汗王  
汗勉焉使人告札木合札木合則曰昔鐵木眞安荅嘗與我同營  
按彈火察兒何不立爲汗而遲至今乎遂指爲離間又札木合有  
弟曰秃台刺兒居玉律哥泉搠只者忽魯刺汗之子按彈之兄也  
時居薩里河以秃台刺兒奪其馬射殺之札木合緣是以爲太祖  
殺其弟因大約朔方諸部會塔塔兒蔑里乞皆與太祖有舊怨而

秦赤烏尤不樂太祖之崛起也三部旣從札木合則諸部靡然向  
風由是札木合得集十三部之眾以攻太祖太祖戰不利退師札  
木合大殺掠而還札木合遂以此雄朔方踞諸部上旣而太祖會  
王汗破塔塔兒於斡難河受金爵賞諸部益大恐以爲惟札木合  
足恃以翦太祖也遂合十一部之眾立札木合爲局兒汗札木合  
亦傲兀自喜太祖聞之復約王汗逆擊之於闕奕壇札木合恃乃  
蠻神巫以戰旣而無功十一部皆敗事在乃蠻傳中札木合乃喟  
然歎息以爲殆天亡之也亦以數興師用乏遂道掠立已者諸部  
而還自是札木合不信於諸部黨孤矣王汗復追之急札木合不  
能自振遂降於王汗後王汗與太祖同伐乃蠻札木合思伐其交  
以敝之因言於王汗曰我於君白翎雀也寒暑共之鐵木眞將無  
爲鴻雁就暖則南飛乎王汗左右台鄰曰汝何媚王汗而譖其兄

弟也自是王汗始疑太祖然王汗亦不甚信札木合札木合則日夜搆太祖於王汗子亦刺合克烈卒以此亡初札木合與太祖交而背太祖既降王汗王汗敗札木合又圖殺王汗不克則奔於乃蠻乃蠻與太祖戰於納忽嶺下札木合則張太祖之勢以動乃蠻又以乃蠻虛實告於太祖乃蠻亡札木合遁從者惟五人執札木合而以獻於太祖太祖立斬五人者而使人慰札木合曰安荅之惠我固未忘也今請安荅助我矣札木合曰安荅善用人故成功我以失人心故敗今安荅克膺天命札木合不能事安荅也遂飲藥死太祖命厚葬之先是諸部之棄札木合從太祖也有豁兒赤八阿鄰部人也是識牛鳴因告太祖言夜有二牛一牛繞札木合廬帳觸之遇車而折其角牛鳴曰札木合還我角一牛曳將繫帳大杙而鳴曰天地以鐵木眞爲國土主我載國以往也至是太祖

果克札木合收朔漠竟應其言札荅刺氏別支曰木勒合勒忽早歸太祖後以功爲千戶

克烈一曰怯烈一曰怯烈亦一曰客列亦惕初在謙河之南唐麓山北距大都九千里當烈祖時其酋曰脫里亦曰脫幹里曰脫幹憐始率眾南徙秃兀刺河居黑林由是與烈祖爲鄰先是脫里父忽兒札胡思盃祿汗能輯其眾有子四十人脫里立好誅戮兄弟於是其叔父菊兒攻之蹙之哈刺温之隘脫里僅以百騎免奔於烈祖烈祖爲興師逐菊兒菊兒奔西夏烈祖乃以脫里復歸克烈脫里因與烈祖同盟相稱爲安荅烈祖崩太祖少泰赤烏又齟齬之而蔑里乞以烈祖昔嘗奪其婦憾而攻之亦虜宏吉刺可敦以去脫里救助爲破蔑里乞而還之太祖亦自是日強歲餘蒙古人立以爲汗會脫里弟也力可哈刺復怨脫里乃叛附於乃蠻乃蠻

助也力哈可刺以兵奪克烈脫里乃走依西遼旣而復歸糧絕捋羊乳以飲刺橐駝血食焉太祖聞其憊也遣親近招之迎之於秃兀刺河尊之爲父資給甚備脫里由是再集其部眾士馬復盛矣無何塔塔兒叛金太祖乘其閒約王汗以兵會金師斬其酋金以爲功拜太祖察兀忽魯而爵脫里爲王所謂王汗者也已又與太祖大破十一部之師於闕奕壇事在太祖紀明年大掠蔑里乞而還遂會太祖兵以伐乃蠻與共逼乃蠻驍將曲薛吾撒八刺壘而軍會日暮各止營而札木合時降於王汗王汗頗中其閒以爲太祖不足信也乃夜然火營中而潛師他所太祖旦問之覺其異遂退師薩里河於是王汗亦還至秃兀刺河而其妻孥部曲已爲曲薛吾撒八刺襲掠以去王汗聞使其子亦刺合及卜魯忽解追之而求援於太祖太祖遣博爾朮木華黎博爾忽赤老溫帥師以往

至則亦刺合大敗流矢及其馬膞卜魯忽解成禽四將乃擊曲薛吾撒八刺敗之盡奪還所掠亦刺合一曰鮮昆曰先昆又曰桑昆鮮昆其官名亦刺合其名也亦曰赤葛喝翔昆諸部皆謂以爲智勇者也於是太祖甚親王汗欲爲子朮赤求納王汗女抄兒伯姬又欲以女火阿真伯姬妻王汗孫秃赤合王汗欲許而亦刺合驕甚以爲太祖非匹敵也遂皆不諧札木合知其情於是盡亦刺合曰鐵木真雖言王汗子而常通乃蠻將於君父子不利亦刺合以爲信然會太祖叔父荅里真及族人火察兒按彈叛附克烈亦共言太祖可卽取也亦刺合遂遣告王汗王汗曰札木合巧言寡信人也不足聽亦刺合數言之至於愠王汗曰吾身之存實鐵木真是賴今髭髮皆白而能無詒我憂可也於是乃來請太祖飲布渾察兒將因而圖焉布渾察兒者言會親酒也太祖以十騎往中道

而還於是亦刺合知太祖覺其詐欲出不意攻之卽以朱力斤勇士爲前鋒次以董哀火力然後王汗以中軍繼之太祖始避於卯温都兒山陰明日太祖使朮赤台畏荅兒帥兀魯忙兀二部先衝之戰於哈蘭真沙陀畏荅兒傷於矢朮赤台射亦刺合中其頰克烈遂退太祖於是遣阿里海賁王汗語在太祖紀王汗聞太祖之責也慙謂其子曰吾言何如亦刺合曰今何言戰耳然太祖雖勝而王汗勢盛軍懼竟潰太祖弟哈撒兒妻子爲所虜己而復整兵於幹難河源遣二人僞爲哈撒兒之使者以往曰我兄不知所之我妻子又在王所王如不念先君之好卽束手來歸矣王汗信之因遣人與二使來以皮囊盛血與盟太祖因卽以二使爲鄉導而夜趨折運都山襲王汗盡降其部眾王汗及亦刺合跳而免路逢乃蠻軍王汗爲所殺亦刺合走西夏掠食焉遂爲西夏所攻走苦

又苦又人殺之克烈遂滅地入太祖焉

蔑里乞三種曰兀都亦惕蔑里乞曰兀洼思蔑里乞曰合阿惕蔑里乞遼梅里急也隨僕骨地在克烈之北幹兒寒辭靈哥河上其長曰脫脫初太祖之喪父也少而太祖母月倫可敦本蔑里乞也客赤列都之妻也烈祖奪而有之蔑里乞常憾焉亦會其時太祖未有徒眾脫脫乘太祖之敝以兵攻太祖三周不而罕山虜可敦宏吉刺氏去賴克烈王汗返之太祖旣復盛蔑里乞遂從札荅刺犯太祖會王汗失國新復不自給太祖遂伐蔑里乞與脫脫戰於莫耶察山掠取其貲財田禾遺王汗以明德怨於是蔑里乞益與札荅刺比札木合之立爲局兒汗也蔑里乞從與乃蠻俱敗去明年王汗進攻蔑里乞復敗之脫脫奔八兒忽真之隘克烈遂大掠蔑里乞而還其後克烈亦滅金山南諸國惟蔑里乞乃蠻存脫脫

乃倚乃蠻爲死生從乃蠻太陽汗與太祖戰於納忽嶺下太陽汗陣歿太祖遂進討蔑里乞脫脫大恐乃委國出奔乃蠻依其汗卜魯欲太祖虜卜魯欲遂射殺脫脫於也兒的石河霍都者脫脫子也計不能復國乃與其弟赤刺溫馬札兒禿辭干裏脫脫首而以其餘眾西奔將之畏吾兒爲其王巴而朮阿而忒的斤所拒於是乃道哈刺魯走太和嶺東牧焉無何太祖聞之恐其復強爲患而又憂其遠也乃會諸將於和林問誰能爲我討蔑里乞者速不台請行太祖壯之乃使阿里出領百人先焉以覘其虛實戒之曰汝行必載嬰兒具止宿則或遺之若挈家逃者毋使蔑里乞知爲備也阿里出遵其計蔑里乞果不爲備速不台遂蹤及蔑里乞於蟾河一戰獲其二將蔑里乞之眾悉降霍都奔欽察太祖使人索之欽察汗亦納思不從語在西域傳於是太祖怒乃製鐵車與速不

台諭之曰蔑里乞吾深仇也今敗遠遁猶馬帶竿鹿之負箭也汝其追之若飛汝作鷹鷂若入穴汝作鋤若入海汝其網與汝鐵車所以堅汝志也速不台遂進兵敗欽察於玉峪欽察降亦納思孫班都察從速不台討霍都及其餘黨盡殄滅之師還并敘班都察功事在班都察傳

乃蠻遼史見焉初在結骨舊地謙河之旁後徙金山之陽金山國語曰按台山者也其國東踰斡兒寒河與克烈接西至也兒的石河與哈刺魯接南則限以沙磧蓋幾盡有唐時回紇之地太祖旣稱汗其時乃蠻汗曰亦難赤嘗興兵助克烈王汗弟也力哈可刺以逐王汗太祖助王汗復汗克烈乃蠻由是遂與太祖有隙然其視蒙古蔑如也會太祖破塔塔兒札荅刺酋札木合因煽合諸部立己爲汗乃蠻亦從之聲勢甚盛諸部遂恃乃蠻爲軍鋒太祖及



王汗則倚斡難塞爲壁乃蠻軍大衝突不能前旣而合戰於闕奕  
壇乃蠻有巫解作風雪將踏太祖然反大敗事在太祖紀十一部  
皆解散太祖以亦難赤輒恃強逞兵思有以懲艾之亦難赤二子  
曰卜魯欲曰太陽皆稱汗而太陽尤驕佚亦難赤死太祖亦旣并  
泰赤烏塔塔兒遂遣哈撒兒伐乃蠻大破其軍復與王汗同伐乃  
蠻時遇卜魯欲汗前鋒也的脫孛魯於黑石八辛禽之尋王汗牙  
帳爲乃蠻大將曲薛吾撒八刺所襲掠以去太祖揀出之語具克  
烈傳無何克烈以背太祖見滅於是卜魯欲與太祖屢交兵懼其  
威氣已奪至是益懼而太陽汗猶自以爲雄大軼諸國也會聞太  
祖獵於帖麥該川宣號令太陽汗乃遣使謀於汪古長阿刺忽思  
曰東方殆將稱帝矣天有二日耶君能益吾右翼吾將奪其弧矢  
也阿刺忽思以告卽降於太祖於是太祖欲伐乃蠻而以春草未

生馬方瘦心且猶豫別里古台曰乃蠻欲奪我弧矢小我也彼恃  
其國大而言夸吾乘其不備而攻之破之必矣太祖乃遂進兵當  
是時乃蠻宿將惟曲薛吾撒八刺甚不願太陽之構兵也方太陽  
遣使之汪古曲薛吾撒八刺卽言蒙古未可輕無啟釁又其時克  
烈王汗死太陽取其首祭之樂作而首笑國人又多言犬吠有異  
聲曲薛吾撒八刺皆以爲非吉徵也宜卽休息待時而動太陽汗  
不聽及太祖至太陽汗知太祖馬瘦乃與眾謀誘太祖深入而禽  
之其將火赤迷八對曰昔先汗戰伐未嘗使敵人見馬尾人背也  
今畏之乎旣畏之何不使可敦將也太陽汗怒遂循塔米兒河渡  
斡兒寒而東戰於納忽山下太祖禽而斬之旣而卜魯欲汗獵於  
兀魯塔山莎合水上太祖遽禽以歸於是太祖闢地數千里哈刺  
魯降矣其後太祖遂以和林爲都故乃蠻帳也世祖時以爲嶺北

行中書省語在寰宇志屈出律者太陽汗子也亦曰古出魯亦曰古徐鬼亦曰古續兒爲人勇鷙多譎二汗旣敗屈出律乃西保也兒的石河圖復乃蠻未幾太祖再伐之屈出律遂西奔西遼是歲太祖三年也其時西遼末主直古魯保有西遼三世矣弱不能使其屬屈出律至末主愛其壯將藉其力以讐諸國乃妻以女而寵任焉屈出律旣執西遼權乃潛結回回可弗又滅里鎖潭汗共襲西遼而以葱嶺西地賂之末主不之知也太祖之六年其秋末主方出獵而屈出律遂執末主幽之以爲太上皇而代其位會是時太祖圖金中都連年進退山前後未暇西討於是屈出律腹心徧於西遼舊地遂破別失八里脅取哈失哈兒押兒牽幹端諸城大擾畏吾兒屯師阿力麻里將謀東犯矣太祖心知屈出律驍桀難制而金已弱中都亦坐困不難取也遂帥師親征敗乃蠻於阿力麻里遂取古則幹兒朶於是屈出律東奔而南拒大軍於別失八里又拒諸高昌皆大敗太祖遂急進兵而先鋒哲別已斬屈出律傳其首以徇諸部事具哲別傳於是乃蠻絕數年太祖遂西征至於海乃蠻發之機也

乞力吉思亦曰吉利吉思曰乞里乞思曰萬乞兒吉思亦曰土綿乞兒吉速執遼曰轄戛斯唐黠戛斯也一日居勿亦曰結骨紇骨紇斡斯在漢時爲堅昆其音一也其種雜丁零匈奴以王李陵者也故有陵裔焉國人多赤髮皙面綠瞳若黑瞳則陵裔矣唐時遣使入朝高宗稱其國以爲是同宗也唐末最盛大元時境地止千餘里矣南至大都萬有餘里謙河經其東西北流注昂可刺河以入於海其俗杞柳爲杯皿剝木渡水廬帳以居逐水草畜牧同蒙古亦頗知田作而不解鑄農器語言同畏吾兒至其地產名馬跨

木馬行冰雪亦自唐時然也元時曰火因意而干譯言曰林木中百姓以其地多古時巨林也人與乞利吉思錯居太祖旣建帝號命豁兒赤爲萬戶鎮守也兒的石河以下明年命朮赤往征林木中百姓朮赤自斡亦刺禿巴思而北師至乞力吉思其酋野牒亦納里降朮赤遂盡收失必兒以南林木中百姓而還十二年林木中吐麻叛執萬戶豁兒赤太祖復使斡亦刺酋忽都花別吉往諭之亦爲所囚於是博爾忽往征之遇伏死禿魯伯乃聲言攻其隘而潛師自山顛伐木除道襲克之是時遣使徵兵於乞力吉思不奉詔乃命朮赤再征之乞力吉思遂服朮赤乃進招撼哈納烏思帖良兀克失的迷皆降於是闢地至北海矣帖良兀克失的迷後皆統於昂可刺昂可刺以水名其語言與乞力吉思異本亦黠戛斯也唐書稱仙娥河與劍河經其國合而北入於海昂可刺是仙

娥河下流劍河卽謙河也再北至海皆昂可刺地或以爲唐骨利幹矣烏思在謙河東其俗每六月上旬刑白馬牛羊灑馬漣咸就烏思水祭河神謂始祖所從出也撼哈納在烏思東南謙河之源林樾險阻多獸少畜俗皆以樺皮作廬帳白鹿負行裝取鹿乳采松實及山丹芍藥爲食言撼哈納者布囊也謂其地惟有二山口可出入口小腹大形類布囊故以名焉撼哈納西南謙河之內又有益蘭州以地有大蛇名益蘭者蛇也益蘭南有謙州亦曰欠欠州在謙河南唐麓嶺北亦黠戛斯地唐書所謂南倚貪漫山者貪漫山蓋卽唐麓嶺也去大都九千餘里地沃衍宜稼其治器大抵俱同乞力吉思始時蓋卽黠戛斯也至元七年設乞力吉思撼哈納謙州益蘭州等處斷事官治益蘭合烏思爲五部昂可刺附焉其後爲叛王海都等所據至大後始平

論曰金起於東則先收東海元起於北則先卷室建伊列遂踰丁  
零蓋非資近爲之羽翼則無以及遠也然秦赤烏則親族也太祖  
之驚甚於晉獻之滅桓莊矣亦其勢則然乎况自至元以後憑陵  
深險豕窟蛇穴不在他族而在其子孫吳起云舟中敵國尤不若  
是之切近災也鼎定燕雲則鞭長與歎形格勢禁自然之道也然  
元終始皆倚和林開國之模雄矣哉

湘鄉尹襄廷

湘鄉彭翊綸 刊

曾宗修

門人曾淑身襄校

門人曾士琮詳校

元書卷二十八

元書卷二十九

邵陽曾廉譔

耶律留哥蒲鮮萬奴張鯨石珪李全嚴實列傳第四

耶律留哥故遼族屬也仕金爲北邊千戶初遼亡而契丹舊部散  
居臨潢諸地招討司譯史撒八以不願從金海陵南伐乃倡衆爲  
亂承安時特滿羣牧契丹福壽隨鎖再反皆旋即削平然金人疑  
之益深由是故遼人多不自安大安初留哥窺金政不綱遂遁至  
韓州糾壯士剽掠其地州發卒追捕留哥皆擊走之益募兵不數  
月衆至十餘萬推留哥爲都元帥徙北駐隆州營帳百餘里威聲  
甚厲太祖七年按陳那顏行軍至遼留哥聞太祖崛起竊嚮之欲  
以爲聲援乃帥所部會按陳於金山刑白馬白牛登高北望折矢  
以盟按陳曰吾奏上自後以征遼之責屬爾矣會金咸平總管胡

沙來討陣於迪吉海按陳以千騎援之留哥從子安奴爲先鋒大敗金師以所俘輜重獻太祖乃召按陳還而以可特哥副留哥屯其地尋與金東路宣撫司都統紇石烈桓端戰於御河寨失利然桓端卽引還留哥勢亦益張明年眾遂推留哥爲遼王建元元統立妻姚里氏爲妃以其屬耶廝不爲郡王坡沙僧家奴耶的李家奴爲丞相元帥尙書統古與撥著行元帥府事踰歲金遣使青狗來招降青狗度不能致留哥反臣之是時金蒲鮮萬奴爲遼東宣撫使乃進兵征留哥留哥逆擊於歸仁河上金兵大潰萬奴收散卒奔東京安東同知阿憐懼遣使求附於是遂都咸平號爲中京復敗金左副都元帥耶律都之師十年留哥益南破東京萬奴走而可特哥納其妻留哥不直之由是有隙旣而耶廝不等勸留哥稱帝留哥曰向者吾與按陳盟願附大蒙古國削平疆宇今若食

言是逆天也逆天不祥眾請愈力留哥不獲已遂稱疾不出而潛與其子辭闇奉金幣九十車金銀牌五百馳至按台八都魯入覲太祖曰漢人先納款者先朝行太師阿海曰若是則劉伯林太祖曰伯林迫於重圍而來未若留哥之仗義效順也乃先留哥太祖旣見其所進金幣謂左右曰留哥所獻白之於天乃可受也乃前陳藉以白氈七日而後納諸庫因問舊何官曰遼王命賜金虎符仍遼王又問戶籍幾何曰六十餘萬太祖乃命質三千人而遣蒙古三百人往取之亦命留哥遣人偕焉留哥遣大夫乞奴行太祖命之詰問可特哥納萬奴妻罪而繫之來於是可特哥懼謀於耶廝不耶廝不性野軼原不樂留哥之請屬太祖也因遂給眾言留哥已死卽殺蒙古三百人惟三人逃歸以聞太祖慰藉留哥命徐圖之而萬奴聞留哥已去遂卽進兵復取東京咸平耶廝不等走

屯遼南明年乞奴金山青狗統古與等推耶廝不僭帝於澄州仍號遼改元天威以留哥兄獨刺爲平章青狗爲元帥方閱月青狗復歸於金眾遂殺耶廝不而推乞奴監國與其行元帥鴉兒分兵民爲左右翼東屯開保州尋爲金蓋州守將眾家奴所攻敗留哥引蒙古軍數千適至得兄獨刺妻姚里氏戶二千還會國王木華黎拔復蓋州斬眾家奴留哥遂渡遼河徙居臨潢旣而金山殺乞奴自稱國王改元天德統古與殺金山咸舍又殺統古與皆自立十三年留哥引蒙古契丹軍並乞師於蒲鮮萬奴至高麗高麗以咸舍之擾其地遂請降而萬奴以可特哥事義留哥且以爲與國也皆遣軍來會遂圍江東城於是咸舍自經死留哥徙其遺民於西樓自留哥北覲遼東反覆三載留哥卒討定其亂然東京未能復也十五年留哥以疾薨於臨潢

薛闍從留哥入覲留哥之國而薛闍從太祖西征留哥薨皇太弟國王斡嗔承制以姚里氏權領其眾旣五載太祖始還至西夏姚里氏攜其子善哥鐵哥永安及從子塔塔兒孫收國奴往見帝於阿里湫城太祖訝曰爾來耶此健鷹飛不到也因大慰勞之姚里氏請以次子善哥代薛闍扈從而使薛闍歸國襲爵太祖曰薛闍今爲蒙古人矣當回回圍太子於合彌城薛闍救出之身中槩又戰於蒲華薛迷思干傷於流矢以是積功爲拔都魯不可遣卽令善哥襲父爵耳姚里氏拜且泣曰薛闍者留哥前妻所出嫡子也宜立善哥者婢子所出若立之是私己而蔑天倫也婢子竊以爲不可帝歎其賢給驛騎四十從征河西賜所俘士馬金幣皆以九計許以薛闍襲爵而留善哥塔塔兒收國奴於行在惟遣其季子永安從姚里氏東歸二十二年乃詔薛闍曰昔爾父起兵自遼東

會朕師又能割愛以爾事朕嗣經叛亂人民離散欲食爾父子之肉者今豈無人乎朕以兄弟視爾父則爾猶吾子爾其與吾弟別里古台並轄遼東軍馬爲第三千戶辭閣受命太宗二年扈從南征以功賜馬牛羊皆數百頭三年命與撒禮塔東征收其父遺民移鎮廣甯府行廣甯路都元帥府事數歲連征高麗東夏復戶六千有奇十年卒子收國奴襲爵行廣甯路總管軍民萬戶府事易名曰石剌征高麗有功憲宗命益金更造所佩虎符賜之遂佐諸王也苦及元帥札剌兒帶控制高麗九年卒子古乃嗣至元六年朝廷並廣甯於東京去職是歲卒善哥賜名忸兀台以功襲充拔都魯終廣甯尹

蒲鮮萬奴或曰完顏萬奴史闕莫能質正疑金主賜之國姓故有二稱也萬奴以健名金大安時爲監軍與招討使紇石烈九斤帥師及太祖戰於野狐嶺敗績耶律留哥起隆州乞降於太祖已敗胡沙之兵金主珣立以萬奴有膽勇薄其罰使治軍咸平以自效然萬奴見國勢日衰寢慢不肯爲盡力時東北路招討使完顏鐵哥兵頗強萬奴忌之乃牒取所部騎兵二千又召泰州軍三千及戶口遷咸平鐵哥察其有異志留不遣尋萬奴進遼東宣撫使遂下鐵哥獄殺之又與宣差蒲察五斤及北京宣撫使奧屯襄論事不合金主賜襄及萬奴五斤詔書諭以守國家重地當協心盡公徇國家之急各懲前過以圖後功萬奴卽出師擊留哥至歸仁河上而留哥之衆大至萬奴始以留哥初起多烏合易之及是驚其勁整衆遂大潰萬奴度不能守咸平卽走入東京明年留哥則進兵攻東京萬奴亦不能禦復棄城遁金主猶欲牢籠使之乃詔萬奴選精銳擇屯瀋州廣甯以俟進止萬奴惟憚留哥適留哥部下

元書 卷二十九  
多齟齬留哥因潛行北覲太祖萬奴聞乃大喜揮師疾進攻破東京復徇咸平及韓隆州皆下萬奴既得志則遂以爲金不可復存斷遼以東割據其土猶可以爲國也是時留哥之屬耶厮不等已叛留哥南走屯澄州率齷齪賊不能振遼瀋諸猛安謀克人多從萬奴萬奴勢大張遂以步騎九千侵婆速近境金婆速都總管紇石烈桓端擊破之復攻上古城及望雲驛皆不勝都統夾谷合打破其眾數千於三义里温迪罕柏哥輦拔其大甯鎮萬奴復勒其眾九千人出宜風及易池皆爲桓端所敗其歲金中都不守萬奴遂自稱大真天王建元天泰明年攻澄州取之耶厮不死其眾皆走入高麗邊萬奴遂遣使求內附以其子帖哥入侍太祖受其降已而桓端改邳州刺史西還金興定元年金主以權參知政事遼東路行省完顏阿里不孫行尙書省元帥府於婆速路以權遼東

路宣撫使蒲察五斤權參知政事行尙書省元帥府於上京以萬奴叛逆未殄詔諭遼東諸將其歲蒲察五斤復充遼東行省然皆不能討萬奴萬奴復以兵侵婆速高麗畏萬奴之強助之糧八萬石而阿里不孫貸糧於高麗高麗不之應也是時木華黎方帥師渡遼取復蓋金諸州萬奴以已降得仍其境土不受兵會太祖召木華黎還專南伐萬奴遂無所忌乃復叛改國曰東夏然亦結好留哥以爲與國留哥追討其叛人咸舍於高麗萬奴遣其元帥胡土以兵十萬助之久之遂東攻上京殺同知留守温迪罕老兒既而上京行省太平陰受萬奴命焚毀上京宗廟執元帥承克奪其軍遂盡有上京諸路地數千里金正大三年詔諭高麗及遼東行省葛不靄討萬奴赦其脅從者然是時金已朝夕不自保遼東行省惟守婆速一路外扞高麗內逼萬奴無所展濟奉詔書束手而



元書 卷二十九 五  
已國兵又方與金人力爭中原未暇東略萬奴晏然盜據一方其設官行政史文不備太宗元年撒禮塔攻殺葛不孛三年撒禮塔復伐高麗高麗降五年定宗以皇子帥師及諸王按只吉歹國王塔思征東夏自春至秋萬奴乃就禽師至開元恤品上京諸路悉平萬奴僭號凡十有九年而滅明年金亡

張鯨錦州人也金末政亂諸健桀多殺官吏盜據州土張氏錦州繁族鯨與弟致皆以輕俠聞健兒亡命者多歸之頃息嘯聚至十餘萬眾遂殺其節度使自稱臨海王屬木華黎破北京降興中鯨懼請降詔以鯨總北京十提控士馬從奪忽蘭撒里往征燕南未附州郡鯨始意謂以納土功當世長州里以保親黨及聞南行大不樂木華黎察其意慮有反側乃請以石抹也先監其軍至平州鯨果稱疾不進也先執以送行在太祖責令鯨以其弟致爲質鯨

諾而宵遁也先追而戮之初鯨與致陰計於道當叛致卽起兵爲應至是致已殺使者據錦州然聞鯨已死遂自稱瀛王建元爲興龍卽興兵徇下平灤瑞利義懿廣諸地凌河左右悉皆屬致未幾並陷興中遂遣閒使降金金以致爲特進行北京路元帥兼宣撫使木華黎先遣蒙古不花進軍紅羅山降其主將杜秀奏爲錦州節度使於是致失犄角之勢然木華黎以致地險兵精當蔽之以術亦先遣吾也而等急攻溜石山以致致師致果遣鯨子東平將騎兵八千步卒三萬援溜石木華黎使蒙古不花伏師於永德東而引兵夜出神水以逆之東平兵至夾擊之且令曰賊步兵無甲可疾射之善射者前而騎兵翼以進大敗之斬東平及士卒萬二千八百級遂圍錦州致使其將張太平高益出戰又敗數月致憤將校不戮力殺敗軍者二十餘人高益懼遂縛致以降初致乘義

州元帥王珣軍出興中夜襲義州而屠其家及錦州平木華黎以致及其黨千餘人悉付珣使復仇珣惟誅致家而已已而史進道兵至廣甯田炎降懿州田和尚亦降木華黎怒其反覆悉坑之鯨致兄弟稱王凡三載而滅然善養士致死石抹也先籍其黑軍壯佼萬二千人帥以從征戰輒有功焉

石珪泰安新秦人也金貞祐閒紅襖賊劉二祖起泰安珪與彭義斌時青附焉楊安兒掠莒密季先李全國安用附焉既而二祖安兒死珪等皆降宋號忠義軍明年金侵宋宋淮東提刑節制忠義賈涉分忠義爲數軍以禦金珪軍向濠州頃之以糧匱珪復渡淮大掠焚楚州南渡門賈涉遣人諭以順逆禍福珪乃謝罪去是時季先爲漣水忠義副都統頗有聲望而涉以李全譖殺先使陳選往總其眾先部曲不納選而潛迎珪於盱眙珪入漣水涉不得已

因以漣水忠義統轄授珪然涉耻不能制珪乃從客計先設戰備而遣人往招珪軍宣言曰來者增錢糧不至者罷於是珪黨離散珪懼遂棄其軍仗劍渡淮珪本先輸心於太祖嘗遣其部下劉順見太祖於尋思干太祖慰勞焉至是謁國王木華黎於軍木華黎予以繡衣玉帶時東平垂破木華黎留嚴實圍東平將遂北還預命嚴實及珪分東平南北而守明年東平下珪爲濟兗單三州總管行山東東路元帥佩金虎符移治曹州已而金元帥王庭玉破曹州珪被禽囚至汴金主壯其爲人欲降之珪言不遜金主大怒蒸殺於市其麾下立社兗州祀焉子天祿

天祿小字小哥從父珪來降珪死國王孛魯承制授天祿龍虎衛上將軍東平路元帥佩金虎符太祖二十年以兵從孛里海敗宋大名總管彭義斌於贊皇又敗叛將武仙之師明年孛魯上其功

元書 卷二十九  
以爲金紫光祿大夫都元帥數與金人戰未嘗敗北太宗四年皇  
太弟國王幹嗔南渡河天祿爲先鋒奪其船夜至歸德城下襲其  
營殺三百人金出兵圍之天祿潰圍奮擊金人退走南畧亳州提  
控楊春以州降時徐州已降於國安用天祿至徐而還明年從阿  
朮魯破歸德六年入覲命以征行千戶濟兗單州管民總管世襲  
七年從國王塔思渡淮畧隨州至襄陽夾河寨又從攻蘄黃皆有  
功詔天祿括戶東平收其賦稅俄以病免子興祖襲職明年卒興  
祖積功至武顯將軍佩金虎符卒子璉嗣

李全濰州北海人也叛金爲紅襖賊後降於宋宋人名其軍曰忠  
義久之軍數爲亂屢害制置使然全竟累官爲保甯軍節度使事  
在宋逆臣傳太祖十七年全入益都常往來淮岱間二十一年以  
全數剽山東爲患詔郡王帶孫征之帶孫遂圍全於益都時國王

李魯亦至師遣人招全全不應明年全食牛馬及人幾盡乃請降  
李魯受之朝廷命爲山東行省得專制山東歲獻金幣方全之降  
也張林盡殺全家屬於楚州俄而全聞之乃痛哭請南還言必報  
宋李魯以其反覆初不許全因斷一指爲誓李魯乃奏以爲山東  
淮南行省全以國人數人同行服國人衣冠入楚州遂殺張林然  
猶僞恭順於宋以就錢糧宋冀得少安亦頗餉之全因質貸以抵  
歲輸又與金人合縱金人亦權宜縻之太宗二年全以水陸數萬  
擣宋揚州明年爲宋淮東安撫副使趙范淮東提刑趙葵所敗死  
於新塘尸支解焉全狡暴亦能爲甘言和色然氣灼人諸將率怨  
詛全及見全則莫不惴惴恐懼亂淮上十有餘年宋金皆受其敝  
全死其黨國安用來降以爲都元帥行山東尙書省事復降金旣  
復降宋傳在金史史稱金季青徐淮海之交盜賊蠡起害及無辜

至今仁人君子聞其遺事猶蹙額終日云全子壇

壇小字松壽或曰徐希稷子全所養也全死襲山東行省憲宗八年壇進軍攻拔宋海州漣水軍淮揚大震中統元年世祖加壇江淮大都督壇言宋將來伐請繕城塹朝廷命壇節制在邊蒙古漢軍又言呂文德書辭甚悖乞選將益兵臣當先渡淮以報慢書之辱時世祖方遣郝經使於宋以脩好諭止壇無興師而平章政事王文統忌經欲陷之壇受文統指潛師侵宋至淮安爲宋淮東制置使李庭芝所敗壇匿其實而飾辭上聞言臣所領益都土曠人稀自立海州轉輓未息民生凋敝莫甚斯時若宋人以今西無掣肘併力而東以水陸綴漣而別遣舟師遵海以北擣膠萊之虛然後以步騎直指沂莒滕嶧則山東非我有矣臣昨追敵至淮安實欲乘勝取揚楚謀爲先發徒以執政止臣故未深入若朝旨以棗

陽唐鄧陳蔡諸軍攻荆山取壽泗以亳宿徐邳諸軍同臣指揚楚進發則兩淮可定自是選兵以取江南自守以寬民力無施而不可也時朝廷方用兵北方亦不甚信其言二年宋兵攻漣水壇擅發兵脩益都城詔阿朮等悉赴援仍諭度宜益兵壇遂請節制諸道所集兵馬且乞軍器詔給矢十萬明年壇反殲蒙古戍兵以漣海獻宋並上山東郡縣宋以壇爲保信甯武節度使齊郡王壇尋西據濟南帝命諸王合必赤總督諸軍以討壇又命右丞相史天澤視師節度諸軍乃築環城圍之數月食盡自知城且破乃手刃愛妾而身投大明湖水淺不得死遂被獲史天澤卽誅之軍前以安人心壇凶狡及其父而勇悍不如專制山東三十年前後數十奏皆恫疑虛喝挾敵國以要朝廷始冀不徵其兵久之益自爲完繕益兵計子彥簡質於朝而僭爲私驛自益都至京師質子營故

元書 卷二十九 九  
得逃還又頗僞禮士人王文統本其幕客而譎詐同陰謀不軌以  
迄於戮壇死而議者言當盡罷大藩子弟典領兵民由是史天澤  
嚴實張柔諸子孫皆還私第遂罷世守官焉

張林不知其籍貫初國兵破金益都不守而去林時爲府卒復立  
府金多其功以爲治中而遣田琢爲山東東路轉運使權知益都  
事琢遣林討李旺於膠西禽旺然林爲人凶狠不道不願出琢下  
因琢有徵求頗失眾心林以兵譟而逐琢遂據益都山東諸郡皆  
附之林知得罪於金欲附宋以自固會宋將李全破密州禽金招  
討使黃摑阿魯岱林益決嚮宋而未能達全還濰上冢知林意乃  
薄兵益都城下勸林降林恐全誘己猶豫未納也全約挺身入城  
林乃開門迎全置酒甚歡約爲兄弟遂舉青莒密登萊濰淄濱棣  
甯海濟南十二郡以降宋宋以林爲京東安撫使林與全襲金東

平弗克還益都居數歲全兄福守膠西常舟載貨自淮轉海至膠  
而自膠分運於諸郡率取車於林林不能堪林財計仰六鹽場福  
又欲分其半林許福恣取鹽而不分場福遂大恨怒以爲其弟大  
有造於林而林背恩也因肆謾言欲提兵取林首林懼愬於制置  
使賈涉涉密召林麾下問之福伏兵於途以伺林林覺而免於是  
林黨說林以宋不可恃太祖十六年林復以京東諸郡來降木華  
黎承制以爲山東東路益都滄景濱棣都元帥福聞狼狽走楚州  
涉以責全明年全引兵急攻林會宋知濟南府种贇擊林走之全  
遂入益都其後全以益都降林在楚州殺李福及全妻子全還楚  
州林遂見殺

嚴實字武叔濟南長清人也少豪宕不治生產好交結施與落魄  
里社閒屢以事繫獄諸俠少爲出死力脫之金貞祐元年國兵分

略金地南至於濟沂金時募民爲兵以實爲百戶俄以破走長清賊功授長清尉興定二年權爲令宋將李全破鄒平乘勝而西實謀固守禦因出督租以備糧芻比還而縣已破尋以兵復之明年濟南改屬山東西路於是東平行省受譖謂實與宋有謀遂以兵圍實會是時張林以益都降宋宋使之領京東實乃挈家壁青崖山依林宋因以實爲濟南治中實雖名豪俠然性寬和旣仕金不得行其志改事宋欲有所展布遂北收金人殘郡諸郡樂其惠愛於是太行以東彰德磁洺濬滑皆棄金受實節制太祖十五年金河南軍攻彰德守將單仲告急實請於張林救之林諾而遲不行實獨以兵往比至而仲被禽然彰德復歸實實由是悵然知宋亦不足恃會國王木華黎復南伐實乃決意歸國木華黎輕騎入濟南實籍府二州四戶數十萬以降木華黎承制以爲金紫光祿大

夫行山東西路尚書省事進攻曹濮單皆下之遂從木華黎圍東平明年金行省蒙古綱棄城遁實遂仍東平爲治所十七年宋大名忠義總管彭義斌復取京東實將晁海以青崖降實家皆被掠去義斌兵西下郡縣多歸之二十年遂圍東平實約李里海合兵攻之兵久不出城中食且盡乃與義斌連和義斌亦欲藉實取河朔而後圖之請以兄事實旣而武仙以真定叛與義斌合義斌將趨真定以援仙道贊皇五馬山與李里海軍相望實卽奔入李里海軍遂與義斌戰敗之俄爲史天澤所邀斬事在天澤傳義斌死實從肖乃台收大名復定東平家室亦復完並收恩博諸地凡得全魏十分齊之三魯之九所統至五十四城矣是時所在殘破惟實有善政境內治安四方爭赴焉太宗二年入覲賜之坐宴享終日佩以虎符帝數顧實謂左右曰嚴實真福人也六年復入朝命

以山東行軍萬戶世襲偏裨賜金符者八人九年以實年老詔無事征伐十二年卒實生平好援人於瀕死窮時則已然後郡王帶孫下彰德及濮州諸城皆欲屠之以實諫而止大兵由武休出唐鄧實時在徐邳閒以爲河南破屠戮必多乃遣人多載金緡往贖之靈壁一縣當誅者五萬人實悉救之會大饑河南民被俘而北道多餓殍而法禁匿逃俘保社皆坐實乃命作糜粥置道旁由是全活者眾然實但略知書而雅親文儒其致治績亦多獲諸賢之益云卒之日遠近悲悼野哭巷祭旬月不已中統二年追封魯國公諡武惠子七人忠貞忠濟忠嗣忠範忠傑忠裕忠祐忠貞光祿大夫忠傑忠裕忠祐皆新軍千戶實孫度官至甘肅左丞諡貞憲忠濟一名忠翰字紫芝儀觀雄偉善騎射太宗十三年襲東平路行軍萬戶管民總管開府布政一法其父父時舊賢佐益加尊禮

而從其教由是威惠大著治爲諸道第一又嘗領兵畧地淮漢偏裨部曲皆戮力用命所至有功朝廷數加褒寵忠濟初領千戶十有七憲宗四年詔括新軍山東益兵二萬有奇於是增二萬戶及數千戶皆忠濟統之九年世祖南伐令帥師由閒道會鄂忠濟親帥勇士梯衝攻城師還忠濟選勇敢二千人命千戶將之常列左右甲仗精銳照耀道路人有言其威權太重者忠濟久亦漸怠政事好裘馬飲宴經歷李昶諫正之語在昶傳中統二年乃召還京師然忠濟雖豪侈而治理不替東平廟學地故隘陋改卜高爽地於城東金亡太常禮樂生皆歸東平自其父實常優給之忠濟立局製冠冕法服時常肄習仍加存恤又敬重文儒一如其父嘗迎元好問校士閣復徐炎李謙孟祺皆入選一時文采名於天下時民多逋賦忠濟知其殘困常貸富人金代納歲久愈多及罷人執

元書 卷二十九  
券索債帝聞命以內藏償焉至元二十三年起爲江浙左丞以老  
辭二十九年賜鈔萬五千緡宅一區召其子瑜入侍三十年卒忠  
濟統理方郡凡二十年爵賞刑戮皆自己出及謝去大權貴而能  
貧世以是多之後諡莊孝

忠嗣少從張澄商挺李楨學畧知經史大義憲宗元年忠濟授以  
東平人匠總管新軍立充萬戶從忠濟畧地揚州取邵伯埭世祖  
南伐復從忠濟渡淮分兵出挂車嶺與宋人相拒三晝夜殺獲甚  
眾始達蘄州及攻鄂戰甚力師還授金虎符中統三年李壇反宋  
人援壇徐郢總管李杲哥降於宋宋人去杲哥自陳保城功忠嗣  
發其姦詔誅之救蘄縣攻鄒滕皆有功賜銀幣明年詔盡罷大藩  
子弟典兵忠嗣去職至元十年以疾卒

忠範初爲新軍萬戶中統二年忠濟去職選忠範爲東平行軍萬  
戶管民總管詔諭東平路達魯花赤等官並聽節制三年修復宿  
州蘄縣至元元年議罷諸侯世守忠範例解職明年徵爲兵刑部  
尙書俄命僉四川省事治軍成都七年同僉省也速帶兒分東西  
川兵及宋人戰於嘉定重慶釣魚山馬湖江皆敗之所俘獲甚眾  
九年也速帶兒出討建昌之叛兵多從征宋將咎萬壽乘虛攻成  
都忠範獨與戰不利萬壽遂入其郭忠範退保子城同知王世英  
等八人棄城遁詔罪坐主將縛忠範至京師旣而赦之免其官十  
二年復拜工部侍郎同禮部尙書廉希賢奉國書使於宋至獨松  
關宋將張濡不知其爲使也遂攻之爲所殺忠範早有賢名代兄  
位表請前行省經歷李昶至東平師事之務除宿弊又請補東平  
路廟學太常樂工元代文章禮樂繼續不絕嚴氏父子兄弟並有  
功焉



張晉亨字進卿冀州南宮人也兄顥仕金爲同知安武軍節度使以冀州之眾附嚴實於青崖實來歸顥從進節度使馳從西征戰沒晉亨始從兄詣實實器之妻以女晁海以青崖降宋晉亨聞關來奔僅免於難實遣子忠貞入質晉亨與俱從國王孛魯圍益都以功領恩州刺史兼行省馬步軍都總領實征淮楚河南晉亨畢從太宗命爲東平行軍千戶圍安慶攻定城畧信陽拔六安策功多實卒忠濟奏晉亨權知東平府事歷七載吏畏民安從忠濟入覲時議戶賦銀六兩謂之包銀王玉汝糾東平諸管民官懇於朝玉汝者字君璋東平人爲嚴實令史中書令耶律楚材過東平喜之版授東平奏差官至京師則游楚材門會十投下議各分東平所屬不隸有司玉汝聞之夜哭於楚材帳後楚材問其故惻然使詣帝直懇玉汝進言曰嚴實以三十萬眾歸朝廷崎嶇兵閒三棄

其家室卒無異志豈與他降者同今裂其土地析其人民非所以旌有功也帝直其言時齊榮顯亦以爲言東平得不分至是授左右司郎中總行省之政故力爭包銀事而他道有請試行者晉亨面責之曰諸君職在親民民之利病且不知乎今天顏咫尺而不言罪也承命而歸事不克濟尤罪也且五方物產各異必責輸銀雖破民之家必有不能辦者憲宗然之乃得蠲戶額三之一仍聽民輸他物帝悅晉亨賜以金虎符辭曰虎符長一道者所佩臣屬忠濟復佩之非制也帝益喜改賜璽書金符授恩州管民萬戶從忠範敗李壇軍於遙牆灤移戍宿州以汴隄南北沃壤閒曠乃屯田以供軍大獲其利改淄萊路總管兼軍事大軍伐宋晉亨自安慶渡江丞相伯顏令戍鎮江戰焦山瓜洲皆與有功至元十三年卒官子好古爲宿州千戶移戍蘄州宋人攻蘄戰死齊榮顯者字

仁卿博州聊城人亦實甥也從實歸國積功權行軍萬戶守宿州以傷改東平總管參議兼領博州防禦使大軍攻淮南道出東平民閒共給費二萬錠榮顯詣斷事官訴之得折充賦稅民賴以不困時甚稱之

趙天錫字受非大名冠氏人也紅襖賊之亂其父林保冠氏以功爲本縣令天錫嗣其職會大兵南下耕稼既廢城邑無所恃天錫乃挈縣人避桃源天平諸山太祖十六年歸嚴實隸帳下薦授行軍千戶從攻上黨以功復授冠氏令俄遷元帥右都監仍兼爲令時冠氏元帥李泉叛附於宋大名總管彭義斌天錫乃往依大將李里海軍未幾從破義斌於贊皇授左副都元帥同知大名路兵馬都總管事大軍至以李泉故怒冠氏居民反覆欲屠其城天錫百計救護民賴以免已而李泉復納金河南從宜鄭倜圖冠氏天

錫與岳存拒之岳存者字彥誠亦冠氏人嚴實以爲帥府都總管保冠氏者也鄭倜以萬人至天錫乘陣力守三晝夜存帥死士卒出西門奮擊之倜乃引去存復從嚴實敗武仙於彰德西以五百人還至開州與金張開軍萬餘眾遇存軍依大林戒其部曰眾寡縣殊輕動殲矣當聽吾鼓節乃命騎士居前步卒踵之敵近二十步鼓作無不一當百開眾驚退不能止遂大潰存追二十里不損一卒而還終冠氏丞天錫後朝和林上便民事皆優詔從之授千戶賜金符數歲從伐宋駐軍蘄黃閒被疾還卒於冠氏天錫天資厚重造次必以禮事母孝在軍十數年未嘗妄笞一人誅戮不論也人有以急難來歸者活之不勝算他日有負之者亦不以爲意初縣經喪亂之餘荆棘滿野敝衣糲食與士卒同甘苦立城市完保聚合散亾業單貧備禦盜賊勸課農桑境內獨爲樂土賓客至

者燕享犒勞肅然如太平官府禮成而退元好問楊奐皆客其所  
東平行臺百城皆興學養士自天錫發之也子賁亨字文甫爲征  
行千戶從伐宋累功爲處州路達魯花赤季文龍反賁亨及萬戶  
忽都台討平之忽都台欲屠其眾賁不可曰我受命監此路賊可  
殺民則吾民也將士虜子女金帛杖其倡率者而各以還其人民  
大悅服又數平龍泉遂昌及衢州之亂遷處州路管軍萬戶還冠  
氏卒

論曰唐初杜伏威苑君璋張士貴皆盜也獨羅藝起郎署擁幽燕  
之勁兵號爲驍雄然伏威君璋士貴以歸國而昌藝以反覆而亾  
嗚呼帝王之將興攀鱗者升天反脣者墜淵事固然也萬奴若終  
北面豈不與留哥並福子孫哉張鯨不肯出征不亦愚乎若石珪  
李全何啻狼豕珪竟死事全持兩端而國人以其尸解爲哀非壇  
之悖且馨香矣留哥誓死不帝潛身赴闕有石之介嚴實收納寒  
素安集殘黎父子相繼率爲善政何其休哉當時山東河北無實  
恐未能不誦雲漢之詩致痛於靡有子遺也

元書卷二十九

曾燕翼  
 曾明勳 刊  
 門人曾紀瑞襄校  
 門人曾士琮詳校

元書卷三十

邵陽曾廉撰

烈祖四王列傳第五

烈祖子五人宣懿太后幹勒忽刺氏生太祖皇帝搠只哈兒王合赤温大王鐵木哥幹赤斤國王他姬生別里古台大王搠只哈兒王亦曰哈撒兒亦曰哈札兒亦曰搠只哈撒兒亦曰拙赤哈撒兒自幼以善射聞嘗披三重甲矢能及數百步太祖初起多賴哈撒兒左右之每戰輒為前鋒歸則殿焉太祖嘗遣伐乃蠻大敗其眾於忽蘭蓋側山盡殺其將士積尸以為京觀金泰和三年太祖與克烈王汗有隙為所襲太祖夜走班朱尼河地荒遠餘糧俱盡哈撒兒時別居哈赤温山妻子為王汗所虜獨挾幼子脫虎見月而行枕土而臥探鳥卵而食會於河上是時從太祖者惟

十九人哈撒兒乃射得野馬剗其革爲釜出火於石烹而共啖之太祖因取河水飲衆舉手仰天而誓曰嗟乎使我克定大業所不與諸人同甘苦者有如河水於是莫不泣下俄而整軍破敵其後論舊勳則曰是同飲班朱尼渾河者也太祖旣滅克烈遂伐乃蠻納忽嶺之戰哈撒兒實主中軍遂禽殺太陽汗太祖卽大位論諸功分以部衆四千人自置必闐赤諸官然太祖自是頗忌其能明里也赤哥者太祖舊臣也有七子其一曰闊闐出國人稱之曰帖卜騰格里巫也父子恃寵橫甚嘗故扶哈撒兒以炫其威哈撒兒不敢校而訴諸太祖太祖曰汝平日自謂無敵今何爾耶帖卜騰格里自知結怨於哈撒兒思遂害之因上言天神來告哈撒兒當主百姓太祖遂執之宣懿太后聞之卽駕白駝車馳而至責太祖曰汝弟何罪而自殘骨肉耶汝平諸猛桀皆哈撒兒以弧矢威服

之今大業成欲除之耶太祖懼謝事乃解然猶陰奪其兵惟留千五百人其後復從太祖伐金別將取遼以西復命總兵取女真北地禽郭爾羅斯納林汗盡收兀刺那兀二河之衆徇地至黑龍江沂桃溫水而還太祖封諸弟爲東方諸王皆以此也哈撒兒雄猛而性實恭謹開國功居最太祖嘗曰哈撒兒之射別里古台之力此我所以取天下也然終疏忌之分封以遼河桃溫河閒地於兄弟獨儉太祖西征亦不使之與國事也閒居十數年以疾薨帖卜騰格里後又受幹噴逋卒幹噴往索大辱之幹噴亦訴於太祖太祖未語光獻皇后曰妖巫父子前撻哈撒兒今又辱幹噴陛下在位諸弟長成如檜柏尙踐踏無忌日後兒子小當奈此虎狼何太祖遂命幹噴治之幹噴呼力士拉其脅死哈撒兒子三人曰淄川王也苦曰移相哥大王曰脫虎大王

元書 卷三十一  
淄川王也苦亦曰也古曰野苦曰耶虎曰也忽太宗八年分中原民戶爲諸元功懿親食邑以般陽二萬五千戶給哈撒兒王後憲宗之立及其弟三王皆會於闊帖兀阿闌二年命也苦征高麗三年也苦以怨塔察兒國王因發兵襲其營憲宗遂大會諸王皆厚賜之而罷也苦兵其歲以高麗久未平復命也苦征之攻拔天龍等城遂留與元帥札刺兒帶控制高麗其曰淄川王者以賜戶般陽淄川其倚郭縣因以爲名也憲宗末歲薨子曰愛哥阿不干王亦省稱阿不干嘗征成都立功焉至元十三年以江南平復分信州三萬戶給哈撒兒王後

移相哥大王亦曰亦孫哥亦曰也先哥亦曰也相哥亦曰也松格憲宗世祖之立並有推戴功中統三年賜以螭紐金印至元時薨子勢都兒王勢都兒亦曰失都兒亦曰西迭兒黨於乃顏至元二

十四年乃顏反勢都兒亦舉兵犯咸平復謀劫取懿州帝乃使皇子愛牙赤督遼東宣慰使塔出兵禦之勢都兒敗乃降天子以其祖元功不絕其屬籍復待以宗王恩禮薨子三人曰齊王八不沙曰必烈虎大王曰黃兀兒王八不沙以元貞時駐夏怯綠連嘗敗海都兵得錫金銀錦幣大德十一年改淄川王爲齊王金印獸紐以封八不沙至大中楚王牙忽都來徵舊民於部諸王欲助齊以攻楚八不沙懼奔於牙忽都以避之諸王遂共告齊王反中書左丞相康里脫脫訊之乃釋八不沙而坐告者薨無後黃兀兒王亦曰晃兀而至元三十一年以在軍加賜金銀鞍勒弓矢子三人曰伯木兒王曰齊王玉龍帖木兒曰別里帖木兒王玉龍帖木兒嘗使於察八兒未幾察八兒降延祐三年封保恩王賜金印螭紐四年進位恩王換獸紐印後命續封齊薨子月魯帖木兒泰定元年

元書 卷三十一  
襲封天順元年懷王謀位燕鐵木兒與梁王王禪汝甯王忽刺台相拒居庸紫荆閒月魯帖木兒乘虛以兵犯上都天順帝猝崩月魯帖木兒以擁戴懷王功受上賞天曆二年薨別里帖木兒王亦曰別失帖木兒亦曰別思鐵木兒至治三年以總兵北征別頒歲賜泰定元年賜之金印駝紐其後有齊王失烈門至正十二年獻馬萬五千匹助討賊史亾其世

脫虎大王亦曰脫忽亦曰禿脫亦曰禿忽察兒太祖與共飲班朱尼河水脫虎與焉憲宗立與於會其後無聞

論曰舊紀中統元年言賜諸王爪都伯木兒銀綺金素至元十九年又言撥信州民四百八戶隸諸王柏木兒又昔都兒傳言至元十四年從諸王柏木兒討平折兒凹台岳不思兒於黑城哈刺火林信州固哈撒兒王位下食邑也而分撥以此則伯木兒當爲哈

撒兒後無疑然宗室表謂爲黃兀兒子則是移相哥曾孫勢都兒孫不應曾祖祖父皆存而柏木兒獨受賜也且果若是則當中統初必甚幼弱何以反超越累世以賜歸之哉謂非哈撒兒之裔則又不應烈祖諸王後皆有賜而哈撒兒後獨無也竊意伯木兒必淄川王也苦之子若孫爲哈撒兒王之大宗則與所云賜按赤帶塔察兒爪都例皆同表其有錯置乎疑莫能明姑錄其事使無佚焉

合赤溫大王早薨子曰按只吉歹大王亦曰按赤帶曰按只帶曰按赤台曰安赤台曰按只台曰阿勒赤台太祖卽大位分以兵千五百人封以黑龍江地嘗從太祖西征太宗時從克鳳翔又與口溫不花塔思會拖雷太子之師大敗金兵於三峰山復同貴由太子討蒲鮮萬奴於遼東平之師還討趙祚於興州斬祚八年分食

元書 卷三十一  
濟南五萬五千戶蒙哥大王立爲憲宗按只吉歹與於會得賜金印獸紐其後以其食邑名曰濟南王至元時薨子四人曰合丹大王曰察忽刺大王曰忽烈虎兒王曰吳王朵烈納至元十三年以江南建昌六萬五千戶給合赤溫大王後

合丹大王亦稱合丹禿魯干亦稱合荅罕又曰合刺罕性雄恣恃其勇且地險遠常有異志至元二十四年乃顏反謀於合丹合丹以兵從之旣而乃顏敗死合丹亦敗走猱河俄復與諸王阿而禿火魯火孫等共寇邊盡盜乃顏故地其時諸王愛牙赤乃蠻台平章政事辭闕干帥師擊敗之追攝入黑龍江合丹挺身陷陣師頗潰弗能克而還明年乃詔乃蠻台及濟甯郡王帖木兒御史大夫玉昔帖木兒行御史大夫博羅歡左丞李庭樞密副使合歹分道討之帝重念東方復命皇孫鐵木耳往撫諸軍旣而帝復親征駐

蹕兀魯灰河合丹慄悍敢戰亦頗多譎術與博羅歡戰幾爲所獲賴馬得躍過絕澗乃免旣知車駕在兀魯灰乃出其下游貴烈河將乘虛以犯大甯玉昔帖木兒及帖木兒拒卻之車駕乃南還其冬帖木兒玉昔帖木兒進敗之惱木連惱木連者那兀江也木連言江也亦曰猱河者是也是時已隆寒玉昔帖木兒聲言當俟春方進合丹不意其來玉昔帖木兒乃倍道兼行過黑龍江擣其巢穴夷其城合丹走而免於是無所歸乃出沒宋瓦遼河間爲流寇連犯開元海陽旣而爲平章政事失刺帖木所敗遂走高麗二十八年徹里帖木兒追合丹於鴨綠江及合丹子老的戰不利帝乃復命乃蠻台辭闕干博羅歡征之至青州合丹大敗斬老的合丹惟餘八騎亡去偵之不能獲虜其妻孥班師還其後大德五年合丹孫脫歡自北境來歸其父母妻子皆已殺虜成宗憐而賜之鈔



元書 卷三十一  
脫歡先時亦嘗拒王師與東征左副都元帥兀愛戰黑龍江者也同時附合丹謀反諸王火魯火孫不知所終自阿而禿以下世祖皆赦之謫阿而禿之雲南王也先帖木兒所納答兒之鎮南王脫歡所聶怯來之合刺合孫所朵列禿之阿里所八里帶之月的迷失所幹里羅忽里帶之東海又詔朵魯帶以付曲里吉思脫迭里以付阿里鈔兒赤以付月的迷失合麥以付亦黑迷失皆使從軍自效天子棄舊惡敦一本焉而宗室表皆不載其名故其房系莫能詳也

察忽刺大王亦曰札忽兒亦曰爪忽兒子曰濟南王也只里也只里亦曰也只烈亦曰也只真居濠來河以至元二十四年代勝納哈爲濟南王賜金印駝紐合丹之反也只里初不與於亂明年勅從朮伯大王北征海都未行火魯火孫怒其不從已也攻之也只里

告急於樞密副使土土哈土土哈帥師援之敗火魯火孫於兀魯灰河是時其部曲饑令就食濟南也只里上言臣將濟甯投下蒙古軍東征其家皆乏食乞賜濟南路歲賦銀使易米爲食詔遼陽省致米萬石賑之二十七年詔置王傅秩正四品又敕應昌廩其部曲以懷撫之然也只里雖言東征實與合丹比持兩端二十九年合丹已平東路蒙古軍上萬戶伯帖木兒偵知也只里猶在濠來乃進兵襲之虜其妻子追至陳河也只里以二十餘騎亡去遂收其地得女真戶五百餘以聞帝命以充漁戶伯帖木兒度地置馬站七令歲捕漁馳驛進焉旣而復來歸天子仍赦之也只里已失其故地元貞元年乃命以兵四千戍幹羅思界遣使求馬成宗不允二年命與諸王也里干八不沙駐夏怯綠連河尋命改駐合亦兒亦數被賜賚大德十一年成宗崩也只里黨附安西王阿難

元書 卷三十一 六  
荅武宗立諸王畢會皆曰也只里昔通叛王今又預亂謀遂誅死  
忽烈虎兒王亦曰忽刺忽兒世祖立同東方諸王勸進焉

吳王朵烈納大德十一年也只里誅帝乃改濟南王爲濟王金印  
獸紐以封朵烈納皇慶元年改封吳四年敗叛王荅合孫於和懷  
賜金玉束帶薨子二人曰吳王木喃子濟陽王潑皮木喃子亦曰  
木南亦曰木楠子亦曰木南卽初木喃子爲濟陽王潑皮爲吳王  
天曆三年命兩易之或曰木喃子潑皮之諸父也木喃子子曰西  
甯王阿荅里迷失亦曰忽塔忒迷失至正時有吳王搠失江又有  
吳王朵爾赤當帥師出征以賂中書參議龔伯璉免史失其世  
論曰前史宗室表合丹子曰隴王忽刺出忽刺出子曰濟南王勝  
納哈勝納哈者亦曰勝刺合兒又曰聲刺合兒至元十二年帝命  
勝納哈設王府官三員二十三年省臣請立山東宣慰司帝曰濟

南乃勝納哈分地其令各委官一人同治之而孛秃傳言乃顏聲  
刺哈兒反是勝納哈與乃顏同反也然土土哈傳則云二十四年  
乃顏反陰遣使約也不干及勝納哈勝納哈設宴邀樞密副使土  
土哈將掩其不備而執之會土土哈執乃顏使事覺不果發帝旋  
詔勝納哈入朝將由東道士土哈言於北安王曰彼東方王也脫  
有不虞是縱虎入林也乃命從西道其歲命罷勝納哈濟南所置  
官而平章政事桑哥方正尙書事例言勝納哈所佩曰皇姪貴宗  
之寶宜改爲濟南王印史所言者參差如此夫合丹子曰老的逃  
之高麗常敗徹里帖木里之師爲博羅歡所斬者也其後脫歡亦  
稱其父母妻子喪盡不聞其子有曰忽刺出孫曰勝納哈也而勝  
納哈佩寶又設王府官皆殊恩稠疊不應其祖猶在偏寵其孫疑  
忽刺出爲忽烈虎兒之子而勝納哈爲其孫忽烈虎兒有推戴功

而父子俱卽世故延賞於其孫也况乃顏之反實通合丹假爲其孫則以祖召之可矣勝納哈賴土土哈迫之入朝止罷其所置濟南官而也只里續封卽以是年當是奪此予彼不廢其祖澤亦以見朝廷之公也攷世祖紀言賜諸王按赤帶忽刺忽兒合丹忽刺出勝刺合兒銀各五千兩忽刺忽兒名在合丹前又疑忽烈虎兒爲合丹之兄而勝納哈以嫡長受封亦其理也其曰皇姪貴宗者當是太祖所予按只吉歹猶幹嗔之賜皇太弟寶而其孫塔察兒亦仍之也意史必有錯亂失其序者易滋人惑故循史所紀事實爲之傳而附論勝納哈事從闕如之義焉

鐵木哥幹赤斤國王與太祖特相愛號爲皇太弟國王幹嗔那顏者也亦曰幹辰亦曰幹陳亦曰幹嗔亦曰帖木格幹惕赤斤亦單稱帖木格太祖旣滅克烈大會於帖麥該川以伐乃蠻詢於有罪衆皆謂春馬瘦非戰伐之時宜俟秋幹嗔獨進曰事欲行宜早斷彼馬獨非瘦乎別里古台亦勸速進兵於是遂大破乃蠻卒滅之太祖卽大位與宣懿太后共分得萬人八年從伐金同哈撒兒爲左軍攻下遼以西及女真各地十四年太祖征西域命幹嗔留守卓帳於怯綠連河南明年遼王耶律留哥薨幹嗔承制以其妻姚里氏代領其衆遼用以安太祖賜之皇太弟寶卽封以怯綠連河地號曰國王與哈撒兒合赤温別里古台皆爲東方諸王尋命出鎮保州等路二十二年幹嗔帥師克金信都太宗四年親圍金南京幹嗔南徇地至於徐州與汴師應八年分食益都六萬三千戶後數年薨子七人曰不干大王曰幹端大王曰哈失歹大王曰察只刺大王曰壽王脫脫出曰幹魯台大王曰白虎大王至元十八年復分江南建甯七萬二千戶給幹嗔國王後

元書 卷三十一  
只不干大王早薨子二人曰塔察兒國王曰帖木迭兒王塔察兒  
王幹噴嫡孫當立而幼只不干庶兄幹端大王欲居其位國王傅  
撒里思白於昭慈皇后仍賜塔察兒以皇太弟寶襲爵爲國王憲  
宗立塔察兒與於會七年命帥諸軍南征圍樊城以霖雨連月班  
師還明年攻宋荆山略地至江世祖立塔察兒復與諸王大臣勸  
進敗阿里不哥於昔木土也塔察兒實將左軍塔察兒自少習富  
貴不能戢其下憲宗時塔察兒道過東平掠民羊豕帝遣使問罪  
中統三年塔察兒使臣闊闊出殺花道驛吏帝重傷塔察兒意詔  
徵鈔以贖死人以此少之其時有頭輦哥國王高麗林衍之亂詔  
頭輦哥與左丞趙璧同行東京省事高麗克平事見世祖紀及高  
麗並趙璧傳或曰頭輦哥卽塔察兒異名也是時卽已徙遼塔察  
兒薨子六人曰壽王乃蠻台曰也不干大王曰兀刺吉兒歹大王

曰奧速海大王曰察刺海大王曰孛羅歹大王乃蠻台亦曰乃蠻  
帶亦曰乃馬帶亦曰乃麻歹至元二十四年乃顏反命乃蠻台帥  
師征之明年征合丹皆有斬獲二十八年卒蹙其眾於高麗殲之  
不獲合丹而還後續封壽王薨子曰孛羅大王孛羅子曰遼王脫  
脫自至元時幹噴子孫已居遼東其後遂以怯綠連河地改封晉  
王甘麻刺至大元年乃罷襲國王而留壽王以封乃蠻台仍金印  
獸紐延祐三年復改爲遼王以封脫脫焉脫脫橫暴英宗遇弒脫  
脫知新主立必肆赦遂以私怨殺親王妃主百餘人爲御史所劾  
然能以忠著泰定帝崩脫脫及梁王王禪立太子爲天順帝上都  
陷脫脫死之子曰拔都聚黨於宣德屢殺吏民亦不爲大都屈其  
後天曆二年以遼王脫脫印賜牙納失里續封爲遼王史失其世  
其後復有遼王阿禮失里降於明孛羅歹大王子西甯王搠魯蠻搠

魯蠻亦曰速來蠻至順元年封賜金印螭紐三年詔以鎮禦有勞置王傅官四人鑄印給之至正時薨子四人曰卯罕大王曰本伯大王曰也只大王曰不只兒大王帖木迭兒王至元三年從海都反以兵攻畏吾兒虜其民子三人曰八乞大王曰襲刺謀大王曰撥里吉大王襲刺謀亦曰襲刺門早薨撥里吉子二人曰八里牙大王曰三寶大王

幹端大王亦曰脫帖幹噴庶長子故不立子二人曰阿朮魯大王曰愛牙哈赤王愛牙哈赤以至元二十四年及乃蠻台追敗合丹於黑龍江明年命優增愛牙哈赤等歲賜二十八年賜之印其後無聞

壽王脫脫出從憲宗征蜀憲宗崩於釣魚山脫脫出隨宜處事人皆謂允子亦曰愛牙哈赤大王愛牙哈赤子曰別里帖帖木兒亦稱別里帖木兒亦曰別乞帖木兒世祖命討昔里吉別里帖木兒襲脫忽及昔里吉皆破之事具脫忽傳至元十七年賜之銀印龜紐子二人曰囊家大王曰幹羅思罕王其壽王爵武宗以歸其嫡宗焉

幹魯台大王子三人曰哈八兒都王曰帖實大王曰氣都哥大王哈八兒都子曰某大王某大王子曰思刺歹大王思刺歹亦曰失刺泰定帝親任之車駕幸上都嘗命居守三年遣征北邊致和元年與懷王將脫脫木兒戰於宜興敗績不知所終帖實亦曰鐵失子曰脫帖大王氣都哥子曰脫帖木兒大王脫帖木兒子二人曰燕大王曰也堅黃兀兒王也堅黃兀兒子曰忻都大王白虎大王亦曰伯虎早薨與襲刺謀所屬民戶人匠歲賦中統元年命悉給塔察兒

元書 卷三十一  
別里古台大王亦曰孛魯古帶亦曰別里古帶亦曰孛羅古斛亦曰孛羅古歹亦曰別勒古台於斡噴爲庶兄軀幹偉岸以力聞而性純厚太祖命掌從馬國法每戰遇敗則牽從馬故以腹心爲之並命掌乞列思乞列思言野外牧場也是時太祖諸族兄弟主兒乞氏薛徹別吉薛徹大丑部落方強播里掌別吉乞列思其從者盜勒爲別里古台所執播里怒遂斫別里古台傷其背太祖大怒欲索而誅之別里古台力言不可太祖甚賢之別里古台每從征伐輒先摧鋒論開國功亞於哈撒兒又天資明決太祖之大舉伐乃蠻別里古台贊之也太祖卽大位賜部眾三千人命爲國相又長扎魯花赤授之印使結營居斡難怯綠連二河間近行宮而分封地東過那兀江太宗八年命分食廣甯及恩州萬二千戶憲宗立別里古台與於會薨子三人曰罕秃忽大王曰也速不花大王

曰口溫不花大王至元十八年復以江南鉛山萬八千戶給別里古台大王後

罕秃忽大王性剛猛從憲宗出征戰輒有功及攻釣魚山還經河南招集流亡百餘戶悉以入籍子曰霍歷極以疾廢不能軍世祖使居其所食恩州至大三年薨子曰塔出大王塔出溫文好學通經史能拊循其民時號爲賢王其後有稱恩州諸王按灰者史失其世

也速不花大王子曰廣甯王爪都爪都率東道諸王推戴世祖卽位中統三年以其祖所食邑封爪都爲廣甯王賜金鍍銀印駝紐十三年換金印螭紐薨子二人曰帖木兒大王曰乃顏大王乃顏大王素驕蹇不奉法所親暱用事者塔不歹金家奴皆黠健不能無事嘗見西方諸王稱兵欲效之未有以發也至元二十一年吏

言造船女真百姓及諸投下皆充役女真復發爲軍乃顏勝納哈部鷹房金戶獨不肯調詔遣使發其民乃顏愠以此激其下謀益急二十四年遂發兵反諸王勢都兒魯吉刺歹皆應之時朔方構兵累年東陲幸無事帝知乃顏狂妄實駭非難制念欲急剪之以專事朔方於是自上都親征出大甯百官皆獻馬以給衛士乃顏以金家奴從己而以塔不歹爲前驅詎爲驍桀車駕方至撒兒都魯而塔不歹以兵六萬奄至勢銳甚是時扈從兵少司農卿鐵哥曰此當以計破也於是帝張曲蓋據胡牀鐵哥從容進酒塔不歹按兵旁伺不敢動漢軍都元帥李庭曰彼將遁矣乃引壯士夜以火礮入其陣玉哇失諸將乘之賊果走乃顏見塔不歹敗則亦喪膽北遁帝益知乃顏易與然意在慎重乃留蒙古女真漢軍鎮哈刺河備鈔後復選精騎前進至失刺幹耳朶追及其後軍獲其輜

重千餘兩李庭及御史大夫玉昔帖木兒直前追乃顏禽斬之帝乃南還是役也帝習知軍中事以諸軍將校多國人或其親暱立馬相嚮語輒釋仗逡巡引卻欲革其弊而難之葉李密啟帝宜以漢軍列前與死鬪彼常玩我必不設備則可蹈也同知樞密院伯顏亦奏帝用李庭董士選將漢軍得以漢法戰帝乃使玉昔帖木兒將蒙古軍李庭將漢軍並進共擊之故乃顏不數月而敗塔不歹金家奴尋亦爲玉昔帖木兒李庭所禽殺諸王同反勢都兒魯吉刺歹也不干各有傳餘事敗來歸者詔皆謫江南從軍俾自效然莫能悉舉其名後二十九年詔以乃顏故地阿八剌忽立城爲肇州置宣慰司以鎮東方乃顏有子曰脫鐵木兒大王從昔里吉反至元十六年以入寇和林爲其部眾所殺先乃顏死焉口温不花大王沈勇能用兵太宗時嘗將兵從攻鳳翔俄會拖雷

太子敗金兵於三峰山逾年復將兵略宋江淮克光化棗陽及光舒蘄等州所至有紀律號令肅然張德輝嘗爲世祖論當時將吏之害曰若使宗族如口溫不花使領兵勦舊如忽都虎使治民則天下受其賜矣其爲賢士大夫所稱述如此子二人曰滅里吉歹大王曰瓮吉刺歹王滅里吉歹子四人曰潢察大王曰抹札兒王曰撒里蠻王曰闊闊出大王闊闊出子曰定王辟徹干亦曰辟閣罕成宗時嘗命與也只里駐合亦而至治三年封定王賜金印獸紐泰定元年置總管府薨四年子察兒台亦曰察里台襲瓮吉刺歹至元十三年命戍合荅城以從乃顏反謫居婺州二十六年台州楊鎮龍反瓮吉刺歹討之其歲沿江行院史弼斬楊鎮龍瓮吉刺歹以勞復其分地二十八年命駐夏於晉王封內怯絲連延祐五年來朝天子厚賜之薨子徹里帖木兒續封廣甯王薨子按渾

察至順元年襲其後有廣甯王忽都帖木兒至正十三年薨十四年帖木兒不花復襲廣甯王二王史失其世

論曰太祖之興多資諸弟羽翼而哈撒兒之急難何媿脊令乃獨以讒構終豈非以其技哉是太祖亦大有烏喙之意也然當時有大皇帝二皇帝之稱其不能別嫌明微太祖啟之矣惟終獲保全優游燕獵元世於骨肉多殊恩非元惡大憝類從寬典亦太祖之遺法也厚矣哉



曾宗景

曾燕冀 刊

曾明勳

門人曾傳誥襄校

門人曾士琮詳校

元書卷三十

